

# দস্যুর প্রতিহিংসা ।

( ডিটেক্টিভ-গল্প )

শ্রীপ্রিয়নাথ মুখোপাধ্যায়-প্রণীত ।

৯ নং সেন্টজেমস্ স্কয়ার হইতে  
শ্রীউপেন্দ্রভূষণ চৌধুরী কর্তৃক প্রকাশিত ।



Printed by J. N. De, at the Bani Press.  
63, Nimitola Ghat Street, Calcutta.  
1910.

•

•

# দস্যুর প্রতিহিংসা ।

## প্রথম পরিচ্ছেদ ।

আষাঢ় মাস, অমাবস্কার রাত্রি ; আকাশ ঘনঘটায় আচ্ছন্ন, মেদিনীমণ্ডল একেবারে ঘোর অন্ধকারে আবৃত। তাহার উপর থাকিয়া থাকিয়া, টিপি টিপি বৃষ্টি পড়িতেছে, দূরের দ্রব্য দূরে থাক, কোলের মানুষ পর্যন্ত দৃষ্টিগোচর হইতেছে না। এই ভয়াবহ অমানিশার গভীর অংশে কোন স্থানে জনমানবের চিহ্ন মাত্র নাই, সময় সময় বহুদূর হইতে শৃগাল বা কুকুরের কণ্ঠস্বর অক্ষুণ্ণভাবে কর্ণে প্রবিষ্ট হইতেছে।

এইরূপ সময়ে একটি পুরাতন ও নিন্দনীয় পল্লির মধ্যস্থিত একখানি খোলার ঘরে মিট মিট করিয়া একটি কেরোসিনের আলো জ্বলিতেছে। এই পল্লিটা সৰ্বজনপরিচিত। এই স্থানের অধিবাসীগণের মধ্যে একটীও ভদ্র-লোককে কেহ কখন দেখিতে পান নাই। ইহার অধিবাসী মাত্রই নীচ বংশ-সম্বৃত ও নীচকন্ঠে কৰ্মাধিত। চোর বল, জুয়াচোর বল, জালিয়াৎ বল, এই পল্লির মধ্যে অভাব নাই। জুয়ার বল, চণ্ডুলি বল, আফিংচি বল, এই পল্লিতে যত

অনুসন্ধান করিবে, ততই পাইবে। লাঠিয়াল বল, গুণ্ডা বল, বদমায়েস বল, এই পল্লির গৃহে গৃহে বাস করিয়া থাকে। পাপের প্রশ্রয় দিতে হইলে যাহা কিছু প্রয়োজন, তাহার সমস্তই এই পল্লির মধ্যে পাওয়া যায়। এক কথায়, এইরূপ পল্লি এই কলিকাতা সহরের মধ্যে চারি পাঁচটী ভিন্ন আর অধিক নাই, ইহাই মঙ্গল, নতুবা কোন ভদ্রলোক এই স্থানে এক দিবসের নিমিত্তও বাস করিতে পারিতেন বলিয়া আমার বোধ হয় না। এই সমস্ত পল্লির মধ্যে পুলিশ-কৰ্মচারীগণও সময় সময় বিনা সাহায্যে প্রবেশ করিতে ভয় পাইয়া থাকেন। এরূপও সময় সময় হইয়াছে যে, স্থানীয় পুলিশ-প্রহরী পাহারা দিবার কালীন একাকী ঐ পল্লির ভিতর প্রবেশ করিয়াছে, কিন্তু আর প্রত্যাবর্তন করে নাই। পরদিবস তাহার মৃতদেহ পাওয়া গিয়াছে। এইরূপ ভয়ানক পল্লির মধ্যে রাত্রি আন্দাজ দুইটার সময় পূৰ্ব্বেকথিত একখানি খোলার ঘরে সামান্য একটি কেরোসিনের আলো কেন দেখা যাইতেছে? উহার মধ্যে নিশ্চয়ই কি একটা মহা পাপের আয়োজন হইতেছে ;

পাঠক মহাশয় যদি আপনার সাহসে কুলায়, তাহা হইলে একবার আমার সঙ্গে ঐ স্থানে চলুন। ঐ স্থানে গমন করিলেই ঐ গৃহের অবস্থা অনায়াসে জানিতে পারিবেন।

গৃহটি খোলার ও ক্ষুদ্র। গৃহের অবস্থা দেখিয়া বোধ হয়, উহাতে দুইটি লোক বাস করিয়া থাকে। কিন্তু এখন উহার ভিতর বসিয়া ৭৮ জন লোক কথাবার্তায় নিযুক্ত আছে। উহারা যে সম্বন্ধে কথাবার্তা করিতেছে, তাহা নিতান্ত সামান্য বিষয় নহে, একটা ভয়ানক কার্যের সূচনা করাই ঐ কথাবার্তার মূল। পাঠকগণ উহাদিগের কথাবার্তার কিয়দংশ শ্রবণ করিলেই বুঝিতে পারিবেন, উহারা কিরূপ ভয়ানক কার্যের সূচনা করিতেছে।

১ম ব্যক্তি। প্রসন্নকুমারকে কোনরূপে এই স্থান হইতে স্থানান্তরিত করিতে না পারিলে আমরা কোন প্রকারেই এই স্থানে আমাদের কার্যক্ষেত্র বিস্তার করিতে পারিব না।

২য় ব্যক্তি। কোন্ প্রসন্নকুমারের কথা ভূমি বলিতেছ ?

১ম। ডিটেক্টিভ প্রসন্ন। যে প্রসন্ন আমাদের দলের কত লোককে একে একে ধরিয়া জেলে পাঠাইয়াছে।

২য়। হাঁ, সে আমাদের কার্যে বড়ই ব্যাধিত দিয়া থাকে। তাহার সম্বন্ধে

কোনরূপ ব্যবস্থা করা আমাদের নিতান্ত কর্তব্য।

৩য়। ঐ সে দিবস মঙ্গল প্রভৃতি পাঁচ জনকে এক মোকদ্দমায় জেলে দিয়াছে।

৪র্থ। ভগ্নে প্রভৃতি যে চারিজন ধরা পড়িয়া জেলে গিয়াছে, তাহাদিগকে ধরিয়া দিবার মূলই ঐ ব্যক্তি।

৫ম। জেলে যাওয়াতো আমাদের কাজ, জেলতো আমাদের ঘর বাড়ী আছেই, কিন্তু আজ কয়েক বৎসরের মধ্যে আমাদের দলের কয়েক জনকে একে একে ধরিয়া যে ক্রমে ফাঁসিকাঠে ঝুলাইয়া দিয়াছে, ইহাই বড় দুঃখের বিষয়। তাহাদিগের স্ত্রীপুত্রগণের যেরূপ অবস্থা ঘটিয়াছে, উহার স্ত্রীপুত্রগণেরও সেইরূপ অবস্থা ঘটিলে আমাদের মনে কিছু শান্তি হইতে পারে। আমার বিবেচনায়, উহাকে যত শীঘ্র পারা যায় শিক্ষা দেওয়া উচিত।

১ম। তাহা হইলে আমি দেখিতেছি, আমি যে প্রস্তাব করিলাম, তাহাতে তোমাদিগের সকলেরই মত আছে।

৬ষ্ঠ। নিশ্চয়ই, এরূপ কার্যে আর অমত করিবে কে ?

১ম। এখন কিরূপ উপায়ে আমাদের মনস্থায়না পূর্ণ করা যাইতে পারে ?

২য়। উপায় আর কি ? সুযোগমতে পশ্চাৎ হইতে উহার মস্তকে এক ডাঙা

সাইতে পারিলেই দেখিতে দেখিতে সব  
কার্য শেষ হইয়া যাইবে ।

১ম। ইহা নিতান্ত সহজ নহে, কারণ  
বড় ছাঁসিয়ার লোক, বিশেষ সতর্কতার  
হত সে সহরের ভিতর চলা-ফেরা করে ।  
কার্যস্থ আমি কখন তাহাকে হাঁটিয়া যাইতে  
পরি নাহি । গাড়ী ভিন্ন প্রায়ই সে বাহির  
না । একরূপ অবস্থায় তাহাকে লাঠি  
করিবার চেষ্টা করিতে গিয়া সফল-কাম  
হইবে না, লাভের মধ্যে হয়তো এই হইবে  
, যাহারা ঐ কার্যে নিযুক্ত হইবে, তাহারা  
বিশেষে ধৃত ও কারারুদ্ধ হইবে । একরূপ  
বে কার্য করিতে আমি পরামর্শ দিতে  
পরি না ।

৩। আমি এক কথা বলি । তোমরা  
বেচনা করিয়া দেখ, ঐ কার্যে সম্ভবপর কি  
। আমাদিগের মধ্যে কোন এক ব্যক্তি  
গন একটা অপরাধ করিয়া ধৃত হই ।  
মরা ইতিপূর্বে জেল খাটিয়াছি ও  
লিসের অনেকেই আমাদিগকে চিনে,  
তরাং ধৃত হইবা মাত্র পুলিশ হস্তে লৌহ-  
তকড়ি পরাইয়া দিবে । একরূপ হাত-  
ড়িতে আবদ্ধ হইয়া যখন থাকিব, সেই  
ময় সে নিকটে আসিলে ঐ মহা অস্ত্র হাত-  
ড়ির সাহায্যে তাহাকে একরূপভাবে আক্রমণ  
করিব যে, তাহাকে আর তাহার কার্যে  
শ্রদ্ধেপ করিতে হইবে না, চিরদিনের  
মিত্ত সে এই কার্যে পরিত্যাগ করিবে ।

১ম। তাহাতো হইল কিন্তু যখন তুমি  
ধৃত হইবে, তখন কেবলই যে তোমার হস্তে  
হাতকড়ি দিয়াই যে পুলিশ তোমাকে ছাড়িয়া  
দিয়া বসিয়া থাকিবে, তাহা নহে । হয়  
তোমার কোমরে রজু বেঠেন করিয়া, না হয়  
তোমার হস্তে কাপড় বাধিয়া উহা হয় এক-  
জন, না হয় দুইজন প্রহরী ধরিয়া রাখিবে ।  
তাহারা তোমাকে হঠাৎ প্রহার করিতে  
দিবে কেন ? আর যদি কোন গতিকে  
সুযোগই পাও, তাহা হইলে প্রহার করিবার  
নিমিত্ত তুমি তোমার হাত উত্তোলন করিবা  
মাত্রই তুমি প্রহরী কর্তৃক ধৃত হইবে ।  
বিশেষ, সে যদি তোমার কাছে না আইসে,  
তুমি ধৃত হইলেই যে সে তোমার নিকট  
আগমন করিবে, তাহারই বা কারণ কি ?  
একরূপ অবস্থায় তোমার উদ্দেশ্য সাধন হইবার  
কোনরূপ সম্ভাবনা নাই, লাভের মধ্যে এই  
হইবে যে, যে মকদ্দমায় তুমি ধৃত হইবে,  
সেই মকদ্দমায় তোমার জেল হইয়া যাইবে ।  
একরূপ প্রস্তাবের আমি কোনরূপে অনুমোদন  
করিতে পারি না ।

৪র্থ। আর এক কাজ করিলে হয় না ?

১ম। কি ?

৪র্থ। যে ঘরে ও শুইয়া থাকে, সেই  
ঘরে রাত্রিতে আগুন লাগাইয়া দিলে কি  
হয় ?

১ম। মন্দ হয় না, কিন্তু উহা করিবে  
কি প্রকারে ? সে কোন খোলায় বাড়াতে

ধাকে না, পাকা বাড়ীতে উপরের কোন ঘরে  
ধাকে, সেই ঘরে আশ্রয় কিরূপে লাগাইবে ?  
আমাদিগের চক্ষে ইহাও একেবারে অসম্ভব !

৫ম। যখন সে কোন মকদ্দমার  
অনুসন্ধান বাহির হয়, সেই সময় কোন  
সুযোগে যদি তাহার অনুসরণ করিতে পারা  
যায়, তাহা হইলে সুবিধা মত কোন না  
কোন উপায় অবলম্বন করিয়া তাহাকে শেষ  
করিয়া দেওয়া যাইতে পারে। আমাকে  
এই কার্যের ভার দাও, দেখ, এক মাসের  
মধ্যে আমি এই কার্য শেষ করিয়া উঠিতে  
পারি কি না ?

১ম। পার আমি স্বীকার করি, কিন্তু  
আমার ইচ্ছা এই যে, যেরূপ উপায় অবলম্বন  
করিয়া কার্য উদ্ধার করিতে হইবে তাহা  
অপরে যেন কোনরূপ অবগত হইতে না  
পারে। কার্য শেষ করিবার সময় যদি  
ধরাই পড়িতে হইল, তাহা হইলে ওরূপ  
কার্য করিয়া লাভ কি ? তুমি যেরূপ  
প্রস্তাব করিতেছ, তাহাতে নিশ্চয়ই  
তোমাকে সরকারি রাস্তার উপর বা কোন-  
রূপ প্রকাশ্য স্থানেই তাহাকে আক্রমণ  
করিতে হইবে, সুতরাং কোন না কোন  
লোক যে তোমাকে দেখিতে পাইবে, সে  
বিষয়ে আর কিছুমাত্র সন্দেহ নাই। যদি  
কার্য শেষ করিবার সময় কেহ তাহা  
দেখিতেই পাইল, যাহার দ্বারা কার্য শেষ  
হইতেছে, তাহাকে যদি কেহ চিনিতেই

পারিল, তাহা হইলে সে কার্য করিয়া  
লাভ কি ? তোমার অবস্থাও পরিশেষে  
যদি তাহার অবস্থায় পরিণত হইল, তবে  
সেই কার্যে হস্তক্ষেপ করিতে আমি কখনই  
তোমাকে পরামর্শ দিতে পারি না।

৬ষ্ঠ। আমাদিগের দলস্থিত সকল  
ব্যক্তিকেই যে ও চিনে, তাহা আমার বোধ  
হয় না ; যাহাকে না চিনে, এমন কোন  
হিন্দু যদি কোনগতিকে উহার নিকট কোন-  
রূপ চাকরি গ্রহণ করিতে পারে, তাহা  
হইলে এই কার্য সম্পন্ন করা অতি সহজ  
হইয়া পড়ে। সুযোগমতে উহাকে কোন-  
রূপ বিষ প্রয়োগ করিতে পারিলে, আমা-  
দিগের অভিলষিত কার্য সহজেই সম্পন্ন  
হইয়া যায়।

১ম। এ উপায় মন্দ নহে, কিন্তু  
ভাবিয়া দেখ, আমরা কাহাকে বিশ্বাস  
করিয়া এই কার্যে নিযুক্ত করিতে পারি ?  
যাহাকে সে চিনে না, এরূপ ব্যক্তি কে  
আছে ? আমিতো এরূপ কোন লোক  
আমাদিগের ভিতর দেখিতে পাইতেছি না।  
কারণ আমার বিশ্বাস যে, সে আমাদিগের  
সকলকেই চিনে।

৭ম। এত ভাবিয়া চিন্তিয়া আবশ্যিক  
কি ? চল, সকলে গিয়া একদিন রাত্রে  
উহার ঘরে চুরি করি। আবশ্যিক হয়,  
ডাকাইতিই করা যাইবে। দ্রব্যাদি যত  
আনিতে পারি আর না পারি, উহাকে

গালাড় করিয়া আমরা চলিয়া আসিব ।  
রাত্রিকালে বেশ পরিবর্তন করিয়া গমন  
করিলে আমাদেরকে কে চিনিতে পারিবে ?  
চলিয়া আসিবার সময় যদি কোনরূপ প্রতি-  
বন্ধকতা পাই, বলপ্রয়োগ করিতে পরাঙ্মুখ  
হইব না ।

১ম । ইহা একেবারেই সম্ভবপর নহে,  
কারণ তুমি জান, আজ-কাল সে কোথায়  
বাস করিয়া থাকে ?

৭ম । না ।

১ম । আজকাল সে খানার ভিতর  
তিন তালায় বাস করে । সেই স্থানে গিয়া  
চুরি বা ডাকাইতি করা একেবারে অসম্ভব ।

৮ম ব্যক্তি এ পর্য্যন্ত কোন কথাই কহে  
নাই, সে চুপ করিয়া বসিয়া এক ছিলিম  
তামাকু একাই শেষ করিতেছিল । সে  
কহিল, যাহার বুদ্ধিতে ষেরূপ আসিল, সে  
তাহাই বলিল ; আমিও এ সম্বন্ধে একটা  
কথা বলিতে চাই । দেখুন দেখি, আমার  
প্রস্তাব কতদূর সম্ভবপর হইতে পারে ? এই  
বলিয়া সে ১ম ব্যক্তির কানে কানে কি  
বলিল । তাহার কথা শুনিয়া প্রথম ব্যক্তি  
কহিল, তুমি ষেরূপ কহিলে, তাহা যদি  
করিতে পারা যায়, তাহা হইলে মন্দ হয় না ।  
আমার বিবেচনায় এইরূপ ভাবে চেষ্টা  
করা মন্দ নহে ।

এই বলিয়া ৮ম ব্যক্তি যাহা বলিয়াছিল,  
তাহা সে সকলকে চুপি চুপি বলিল ।

উহাতে সকলেই সন্তুষ্ট হইল । পরদিবস  
হইতে তাহারা ঐ কার্যে প্রস্তুত হইবে, এই-  
রূপ পরামর্শ স্থির করিয়া সকলেই গাজোখান  
করিল । দেখিতে দেখিতে সকলেই সেই  
স্থান হইতে বহির্গত হইয়া ভিন্ন ভিন্ন পথ  
অবলম্বন পূর্বক সেই গভীর রজনীর অন্ধ-  
কারের মধ্যে মিশিয়া গেল । তাহারা যে কে  
কোথায় গেল তাহা আর দেখিতে পাওয়া  
গেল না ।

## দ্বিতীয় পরিচ্ছেদ ।

যে আটজন লোক পূর্বকথিত স্থানে  
সংমিলিত হইয়া ডিটেক্টিভ প্রসন্নকুমারের  
সর্কনাশ সাধনের যত্নগার নিযুক্ত ছিল,  
তাহারা পাঠকগণের সম্পূর্ণরূপ অপরিচিত  
হইলেও তাহারা যে কি চরিত্রের ও কোন্  
শ্রেণীর লোক, তাহার অনেকটা আভাস  
প্রাপ্ত হইয়াছেন, এক ব্যক্তির সংক্ষিপ্ত  
পরিচয় পাইলেই অনেকটা বুঝিয়া উঠিতে  
পারিবেন ।

যে ব্যক্তি প্রথম প্রসন্নকুমারের সর্কনাশ  
সাধনের প্রস্তাব করে, তাহার নাম গঙ্গা-  
রাম । গঙ্গারাম জাতিতে কাহার । সে  
সমস্ত পুলিশের নিকট গঙ্গা কাহার নামে  
পরিচিত । গঙ্গারাম যখন তাহার দেশ  
পরিত্যাগ করিয়া প্রথম কলিকাতার আসে,  
তখন তাহার বয়সক্রম দশ বৎসর মাত্র । এই

অল্প বয়সেই সে বদমায়েসের দলভুক্ত হয় ও সেই সময় হইতেই সে চুরি করিতে আরম্ভ করে। সেই সময় হইতেই ক্রমে সে পুলিশের মিকট পরিচিত হইয়া পড়ে ও সেই সময় হইতেই তাহার মধো মধো কারাবাস দণ্ড হয়।

গঙ্গারাম তাহার বয়স বৃদ্ধির সঙ্গে সঙ্গে, ক্ষুদ্র চোর হইতে ক্রমে বড় চোরে পরিগণিত হয়। যে সকল চুরি অপর চোরে সহজে করিতে পারে না, যে সকল চুরি করিতে বিশেষরূপে বিপদগ্রস্ত হইবার সম্ভাবনা, সে ক্রমে সেই সকল চুরিতে হস্তক্ষেপ করিতে আরম্ভ করে। পাকা দেওয়ালে সিঁদ কাটিয়া, তিন তালী—চারি তালী বাড়ীর ছাদে উঠিয়া লোহার সিন্দুক ভাঙ্গিয়া, বড় বড় বাড়ীতে বা দোকানে চুরি হইলেই পুলিশ বৃষ্টিতে পারিত, এ কার্য্য গঙ্গারামের। বাস্তবিকই গঙ্গারাম প্রায় ঐরূপ কার্য্য করিয়াই লোকের সর্বনাশ করিতে আরম্ভ করে। হঠাৎ ধরা পড়িলে অনেক সময় গঙ্গারাম বল প্রয়োগ করিতে কিছুমাত্র কুণ্ঠিত হইত না। ধৃতকারীকে সাংঘাতিকরূপে আহত করিয়া সে অনেক সময় তাহার হস্ত হইতে অব্যাহতি পাইয়াছে।

এইরূপ গুরুতর অপরাধ করিয়া গঙ্গারাম যে, কখন ধৃত হয় নাই, তাহা নহে, সে অনেক বার ধৃত হইয়াছে, অনেক বার জেলে গিয়াছে ও ছই একবার জেল হইতে

পলায়নও করিয়াছে। কিন্তু সে কিছুতেই তাহার কার্য্য পরিত্যাগ করে নাই বরং উত্তরোত্তর সে ঐ কার্য্যেই তাহার মন নিযুক্ত করিয়াছে ও ক্রমে ক্রমে দল সংগ্রহ করিয়া এখন নিজে দলপতি হইয়া বসিয়াছে। তাহার দলস্থিত সকলেই চোর ও ডাকাইত, সকলেই অনেকবার জেলে বাস করিয়াছে। দলের মধ্যে হিন্দু ও মুসলমান উভয় জাতিই আছে। উহাদিগের জাতি বা ধর্ম পৃথক হইলেও, কর্মক্ষেত্র কিন্তু এক। যখন উহারা সকলে একত্রিত হইয়া কর্মক্ষেত্রে উপস্থিত হয়, তখন উহাদিগের মনে জাত্যাভিমান থাকে না, হিন্দু-মুসলমান জ্ঞান থাকে না, পরস্পর পরস্পরকে আপন জাতী জ্ঞানে গ্রহণ করিয়া থাকে।

গঙ্গারাম দলপতি বটে কিন্তু তাহার বাস করিবার নির্দিষ্ট স্থান নাই; যখন যে স্থানে সুবিধা পায়, তখন সেই স্থানেই বাস করিয়া থাকে। আহারের বন্দোবস্তও সেইরূপ। তাহার দলস্থিত ব্যক্তিগণের অবস্থাও প্রায় সেইরূপ; তবে কাহারও কাহারও থাকিবার স্থান সময় সময় দেখিতে পাওয়া যায়, কখন বা তাহাও পাওয়া যায় না।

চুরি ডাকাইতি করিয়া সময় সময় তাহারা অনেক অর্থ আপনাপন অধিকারভুক্ত করিয়া পাকে, তাহারা সামান্য তাড়া দিয়া কেন স্থিরভাবে এক স্থানে বাস করে না, কেনই বা এক স্থানে আহারাতির



বন্দোবস্ত করে না, তাহার কারণ পাঠকগণ কিছুমাত্র অনাগত আছেন কি? পুলিশ উহাদিগকে সর্বদা নগরের উপর রাখিতে জানে, প্রতি-দিন উহারা কি করিতেছে, তাহা জানিবার নিমিত্ত বিধিযুক্ত চেষ্টা করিয়া থাকেন, কিন্তু উহারা তাহা চাহে না। উহাদিগের গতিবিধি পুলিশ যাহাতে জানিতে না পারে, তাহার নিমিত্ত সর্বদা সতর্ক দৃষ্টি রাখিয়া থাকে; এই নিমিত্তই উহারা এক-স্থানে স্থিরভাবে বাস করিতে পারে না। উহাদিগের নিয়ম এই যে, উহারা সকলে পৃথক পৃথক ভাবে অবস্থিতি করিবে, কার্য-কালে একত্র হইবে। থাকিবার নিমিত্ত উহারা প্রায় সর্বদাই নূতন স্থানের অনু-সন্ধান করিয়া থাকে। কোন অপরিচিত বস্তির মধ্যে কেহ একটী ঘর ভাড়া করিয়া বাস করিতে আরম্ভ করিলে, যে পর্যন্ত না সেই বস্তির লোক জানিতে পারে যে, সে চোর বা যে পর্যন্ত না পুলিশ জানিতে পারে যে, সে সেই স্থানে বাস করিতেছে, সেই পর্যন্ত সে সেই স্থানে বাস করিয়া থাকে, কিন্তু যে দিবস তাহার সেই স্থানে বাস করিবার বিষয় প্রকাশিত হইয়া পড়ে, সেই দিবস সেও সেই স্থান হইতে অন্তর্হিত হইয়া অপর কোন নূতন স্থানের অনুসন্ধান প্রবৃত্ত হয়। এইরূপে প্রায়ই তাহারা তাহাদিগের ঠিকানা পরিবর্তন করিয়া থাকে, সুতরাং তাহাদিগের আহারের ও থাকিবার স্থানের

কিছুমাত্র ঠিকানা নাই। কিন্তু যে যেখানেই থাকুক না কেন, উহাদিগের দলবদ্ধ বালিগণ পরস্পর পরস্পরের সাক্ষাৎ যখন ইচ্ছা তখনই দেখা করিলে পারে, কারণ উহাদিগের পরস্পর পরস্পরকে খুঁজিয়া বাহির করিতে কিছুমাত্র বিলম্ব হয় না।

## তৃতীয় পরিচ্ছেদ ।

সন্ধ্যা হইতে সামান্য বাকী আছে, সূর্য-কিরণ মৃত্তিকা পরিত্যাগ করিয়া বৃক্ষের অগ্রভাগ আশ্রয় করিয়াছে। এক্ষণ সময়ে গঙ্গারাম সেরতনীর একটী বাসার পার্শ্বস্থিত একটী সাকোর উপর একাকী বসিয়া কি চিন্তা করিতেছে, কোথা হইতে আর একজন আসিয়া তাহার নিকট উপবেশন করিল। গঙ্গারাম তাহাকে দেখিয়া কহিল, "কি হে, সংবাদ কি?"

আগন্তুক। সংবাদ জানি আবার কার্যে আমি ঠিক করিয়া আসিয়াছি।

গঙ্গা। বাড়ীটা কেমন?

আগ। আমাদিগের কার্যোপযোগী। কাঁকড়াগাছের যে সকল জঙ্গলময় বাগান আছে, তাহার একটী খালি বাগানের মধ্যে মাঝারি গোছের একটী মোতালা বাড়ী আছে, উহার নিকটবর্তী স্থানে কোন লোক-জনের বসবাস নাই। উহার ভিতর আমরা

বাহাই করি না কেন, কেহই তাহার কিছুই জানিতে পারিবে না ঐ বাড়ীটা আমি ঠিক করিয়া আসিয়াছি।

গঙ্গা। কত দিবসের নিমিত্ত ?

আগ। এক মাসের জন্ত।

গঙ্গা। তাড়া কি দিতে হইবে ?

আগ। বিশেষ কিছুই দিতে হইবে না, বাহার বাগান, তিনি কখন বাগানে আসেন না, কোন সংবাদও লন না, কোন মালিও রাখেন না। নিকটবর্তী এক বাগানের মালীর নিকট ঐ বাড়ীর চাবি থাকে, ঐ মালীকে গোটা পঁচিশ টাকা দিলেই আমাদিগের কার্য উদ্ধার হইবে।

গঙ্গা। তুমি মালীর সহিত সাক্ষাৎ করিয়াছিলে ?

আগ। করিয়াছিলাম, সে রাজি আছে, কিন্তু তাহাকে টাকা অগ্রে দিতে হইবে।

গঙ্গা। অগ্রে টাকা না পাইলে সে আমাদিগকে ঐ বাড়ীতে প্রবেশ করিতে দিবে কেন ?

উভয়ের মধ্যে এইরূপ কথাবার্তা হইতেছে, এরূপ সময়ে আর এক ব্যক্তি সেই স্থানে আসিয়া উপবেশন করিল, উহাকে লক্ষ্য করিয়া গঙ্গারাম জিজ্ঞাসা করিল, তুমি যে কার্যের ভার লইয়াছিলে, তাহার কতদূর হইয়াছে ?

২য় আগন্তুক। কার্য এখনও শেষ হয় নাই কিন্তু অনেকটা ঠিক হইয়াছে, দুই

এক দিনের মধ্যেই কার্য শেষ করিতে পারিব, এরূপ আশা আছে।

গঙ্গা। ছেলে না মেয়ে ?

২য় আগ। ছেলেও আছে, মেয়েও আছে, যেটাকে সুবিধামত পাওয়া যায়।

গঙ্গা। উভয়েই কি এক বাড়ীর ?

২য় আগ। না, এক বাড়ীর বা এক পাড়ার নহে। ভিন্ন ভিন্ন বাড়ীর ও ভিন্ন ভিন্ন পাড়ার।

গঙ্গা। উভয়েই কি বড় লোকের সন্তান ?

২য় আগ। উভয়ের পিতাই সহরের মধ্যে গণ্য মান্য লোক, বড় জমিদার।

গঙ্গা। তাহা হইলে উহাদিগকে জানিতে পারিবে ?

২য় আগ। সে বিষয় আপনাকে ভাবিতে হইবে না, যে কোন উপায়ে হউক, একজনকে না একজনকে আনিয়া আপনার নিকট উপস্থিত করিব। কিন্তু কোথায় যে লইয়া যাইব, তাহাই আমাকে বলিয়া দিন, কেবল তাহাই জানিবার নিমিত্ত আমি আপনার নিকট আসিয়া উপস্থিত হইয়াছি।

গঙ্গা। বাড়ীও একরূপ স্থির হইয়াছে, কলাই পাকা হইয়া যাইবে, ইনি সে সম্বন্ধে বেশ ভালরূপ বন্দোবস্ত করিয়া আসিয়াছেন। যেমন তুমি উহাদিগের একজনকে আনিতে সমর্থ হইবে, অমনি তাহাকে ঐ বাড়ীতে লইয়া যাইও।

২য় আগ । সে বাড়িটা কোথায় ?

১ম আগ কাঁকুড়গাছির মধ্যে একটি বাগানে ।

২য় আগ । কাঁকুড়গাছি বেশ নির্জন, স্থান, বাড়িটা আমরা দেখিব কি প্রকারে ?

১ম আগ । দেখিবার আর ভাবনা কি ? আমার সহিত চল আমি এখনই উহা তোমাকে দেখাইয়া আনিতেছি ।

গঙ্গা । ভাল কথা, এখান হইতে কাঁকুড়গাছি অধিক দূরে নহে । চল, আমরা সকলে গিয়া একবার বাড়িটা দেখিয়া আসি, যদি সুবিধা হয়, তাহা হইলে সেই মালীর সহিত বন্দোবস্ত করিয়া বাড়ী ঠিক করিয়া ফেলিব ।

২য় আগস্তুক ঐ প্রস্তাবে সম্মত হইল । তখন সন্ধ্যা অতীত হইয়া গিয়াছে, মেদিনী অন্ধকারে আচ্ছন্ন হইয়া পড়িয়াছে । সেই অন্ধকারে আপনাপন দেহ লুক্কাইত করিয়া তিন জনেই সেই স্থান হইতে গাত্রোথান করিল, ক্রমে তাহারা কাঁকুড়গাছির সেই বাগানে গিয়া উপস্থিত হইল । দ্বিতীয় আগস্তুক মালীর নিকট হইতে সেই বাড়ীর চাবি ও একটি প্রজ্জ্বলিত কোরোসিন ডিবা আনিয়া উপস্থিত করিল । ঘর খুলিয়া উহার ঘরের মধ্যে প্রবেশ করিয়া ঘরের অবস্থা উত্তমরূপে দেখিল । বুকিল, বাড়িটা তাহাদের মনের মত ।

সেই রাত্রেই ঐ মালীকে অর্থ প্রদানে

সম্বলিত করিয়া এক মাসের নিমিত্ত ঐ বাড়ীর চাবি উহারা গ্রহণ করিল । মালী প্রথমত ভাড়াস্বরূপ এক মাসের অল্প পঁচাত্তর টাকা চাহিয়াছিল, উহারা পঁচিশ টাকা দিতে চাহে, কিং মালী অত অল্প টাকায় ঐ বাড়ী দিতে সম্মত না হওয়ায়, পরিশেষে পঞ্চাশ টাকা সাব্যস্ত করিয়া তখনই ঐ অর্থ প্রদান পূর্বক ঐ বাড়ী গ্রহণ করে । যে অর্থে ঐ বাড়ী পাইবার সম্ভাবনা ছিল, তাহার দ্বিগুণ অর্থ লাগিলেও উহারা মনে করিল, নিতান্ত সম্ভায় উহারা ঐ বাড়ী গ্রহণ করিতে সমর্থ হইয়াছে ।

এইরূপে ঐ বাড়ী সংগ্রহ হইবার পর দিবস হইতেই দলের দুইজন ঐ বাড়ীতে বাস করিতে আরম্ভ করিল । ঐ দুইজনই পাঠকগণের পরিচিত সেই প্রথম ও দ্বিতীয় আগস্তুক । উহাদিগের নাম রামচরণ ও কালীচরণ । রামচরণই এই বাড়ী সন্ধান করিয়া বাহির করিয়াছিল ।

এই বাড়ী ভাড়া করিবার দুই দিবস পরেই কালীচরণ একটি সপ্তম বর্ষীয়া বালিকাকে আনিয়া সেই স্থানে উপস্থিত করিল । বালিকাটি গৌরান্বী, দেখিতে বেশ সুশ্রী । উহার দুই হস্তে কয়েক গাছি সোনার চুড়ি ভিন্ন অঙ্গে আর কোন অলঙ্কার ছিল না ।

ঐ গৃহের একটি ঘরে বালিকার থাকিবার স্থান হইল । সে কাঁদিয়া কাঁদিয়া

পরিশেষে চূর্ণ করিল ও ক্রমে ঘুমাইয়া পড়িল। উহার আহারের নিমিত্ত একটু দুগ্ধ সংগ্ৰহ করিয়া রাখা হইয়াছিল। ঐ দুগ্ধ ঐ বালিকাকে পান করিতে দেওয়ায় সে তাহা পান না করিয়া দূরে নিক্ষেপ করিল।

রামচরণ কালিচরণকে জিজ্ঞাসা করিল, কি উপায়ে ও কেমন করিয়া আমি এই বালিকাটিকে আনিতে সমর্থ হইলে ?

উত্তরে কালিচরণ কহিল, কয়েকটা বালকবালিকা তাহাদিগের বাড়ীর সম্মুখে খেলা করিতেছিল, তখন সন্ধ্যা হইয়া গিয়াছে। আমরা কতকগুলি ফুলের খেলনা লইয়া সেই স্থানে গিয়া উপস্থিত হই, ও একটি খেলনা একটি বালিকাকে দিয়া একটু অগম্য হইঃ অবশিষ্ট সকলে খেলনা চাহিতে চাহিতে আনার পশ্চাৎ পশ্চাৎ আসিতে থাকে। আমিও বালকবালিকা-গণকে এক একটি খেলনা পদান করতে করিতে অগম্য হইতে থাকি। যাহারা খেলনা আনৌ পায় নাই, তাহারা আনার সঙ্গ ছাড়িল না। নিকটেই এতখানি গাড়ী আমি পূর্ব হইতেই টিক করিয়া রাখিয়া-ছিলাম, তাহার মধ্যেও কিছু ফুলের খেলনা ছিল, আমি ক্রমে সেই গাড়ীর নিকটে আসিয়া উহার মধ্যে উঠি। এবং ফুলের খেলনা সকল বাছিয়া বাছিয়া বালকবালিকা-গণের মধ্যে বিতরণ করি, কেবল এই

বালিকাকে দিই নাই। সে আমার নিকট খেলনা চাহিলে আমি তাহাকে গাড়ীর ভিতর উঠিয়া আসিতে কহি। আমার কথা শুনিয়া, সে যেমন খেলনা লইবার প্রত্যাশায় গাড়ীর ভিতর উঠিয়া বসে, তখন পূর্বের বন্দোবস্ত অনুযায়ী কোচমান গাড়ী হাঁকাইয়া দেয়। পাছে সে কাঁদিয়া রাস্তায় লোক জড় করে, এই ভয়ে আমি উহার মুখ বন্ধ দিয়া ঢাকিয়া রাখি। অপর বালক বালিকাগণ তাহাদিগের সাধ্যমত আমাদিগের গাড়ীর পশ্চাৎ পশ্চাৎ আসিয়াছিল, কিন্তু দেখিতে দেখিতে গাড়ী তাহাদিগের চক্ষুর অন্তরাল হইয়া পড়ে। আমরাও ক্রমে এই স্থানে আসিয়া উপস্থিত হই।

রাম। বালিকাকে লইয়া এইরূপে পলাইবার সময় বাস্তার কোন ব্যক্তি কিছুই কি জানিতে পারে নাই, বা কাহারও মনে কি কোনরূপ সন্দেহের উদয় হয় নাই ?

কালি। কেহ যে কোনরূপ কিছু জানিতে পারিবাছে, তাহা আমার বোধ হয় না। তবে গাড়ীর নম্বর যদি কেহ দেখিয়া লিখিয়া লইয়া থাকে, তাহা আমি বলিতে পারি না।

রাম। গাড়ীর নম্বর খুনিয়া রাখিলেই ত হইত ?

কালি। আমরা ইচ্ছা করিয়াই যাহাতে গাড়ীর নম্বর সকলে দেখিতে পায় তাহার উপায় করিয়া রাখিয়াছিলাম।

এই স্থানে বোধ হয় পাঠকগণকে বলিয়া দিতে হইবে না যে, ঐ কোচমানও উহা-দিগের দলভুক্ত এক ব্যক্তি।

## চতুর্থ পরিচ্ছেদ ।

রায় বাহাদুর কিশোরীলাল বর্মন কলিকাতার বাসিন্দা নহেন, তিনি পল্লিগ্রামের একজন বড় জমিদার। দশজনের মধ্যে তিনি বিশেষ গণ্য নাথ লোক। গবর্নমেন্টও তাঁহাকে বিশেষরূপ খাতির করেন বলিয়াই তাঁহাকে রায় বাহাদুর উপাধি প্রদান করিয়াছেন।

তাঁহার পিতা পিতামহ প্রভৃতি চিরকাল পল্লিগ্রামে বাস করিয়া আপনাপন জীবন শেষ করিয়া গিয়াছেন, কিন্তু কলিকাতায় আসিয়া কখন বাসস্থান স্থাপন করেন নাই। তাঁহারা দেশে থাকিয়া, দেশের উৎপন্ন দ্রব্যাদি ব্যবহার করিয়া, দেশের প্রতিবেশীদিগকে লইয়া আয়োদ আহ্লাদ করিয়া, প্রজাদিগের সুখ দুঃখের দিকে দৃষ্ট রাখিয়া, দিন অতি-বাহিত করিয়া গিয়াছেন। কিন্তু আজকাল আর তাহা হয় না; সকলেরই ইচ্ছা, এখন কলিকাতায় আসিয়া বসবাস করেন। যাহারা চাকরি বা ব্যবসা উপলক্ষে কলিকাতায় আসিয়াছেন, তাঁহাদের ত কথাই নাই, যাহারা চিরকাল মফঃস্বলে বড় বড় চাকরি

করিয়া এখন পেন্সন গ্রহণ করিয়াছেন, তাঁহাদিগের মধ্যে অনেকেই কলিকাতায় বাস করিয়া পীড়নের অবশিষ্ট অংশ অতি-বাহিত করিতেছেন। যাহারা কোনরূপ কর্ম কার্য করেন না, অথচ পিতা পিতামহের পরিত্যক্ত কিছু সম্পত্তি আছে, তাঁহারাও কলিকাতায় আসিয়া বাড়ী ভাড়া করিয়া বসিয়াছেন। মফঃস্বলের জমিদার-দিগের তো কথাই নাই, তাঁহারা সকলেই প্রায় আজ কাল কলিকাতার একরূপ অধিবাসী হইয়া পড়িয়াছেন। কেহ বা বাড়ী ভাড়া করিয়া আছেন, কেহ বা নূতন বাড়ী প্রস্তুত করিয়া লইয়াছেন।

কেন তাঁহারা দেশ ছাড়িয়া কলিকাতায় আসিয়া বাস করিতেছেন, একথা জিজ্ঞাসা করিলে কেহ বলিয়া থাকেন, দেশে ডাক্তার কনিরাজ নাই, কোন দ্রব্যাদি পাইবার উপায় নাই, কি সুখে তবে দেশে থাকা যায়? কেহ বলেন, মাল্লেরিয়ার জন্ম দেশে বাস করিবার কি যো আছে? সুতরাং কলিকাতায় না থাকিয়া আর কোথায় যাওয়া যায়? এইরূপ নানা কারণে তাঁহারা দেশে ছাড়িয়া কলিকাতায় আসিয়া বাস করিতে আরম্ভ করিয়াছেন।

রায় বাহাদুর কিশোরী লাল বর্মনও ঐরূপ কোন কারণ বশতঃ কলিকাতায় আসিয়া বাস করিতে আরম্ভ করিয়াছেন। নিজে একখানি বাড়ী খরিদ করিয়াছেন, ঐ

বাড়ীতেই তিনি তাঁহার পুত্র কলত্রাদির সহিত বাস করিয়া থাকেন। বাড়ীতে তাঁহার পৌত্র, পৌত্রী দৌহিত্রী প্রভৃতি ছোট ছোট বালক বালিকা অনেকগুলি। উহারা প্রায়ই একত্রিত হইয়া কখন বাড়ীর ভিতর, কখন বাড়ীর বাহিরে রাস্তার উপর খেলা করিয়া থাকে। এক দিবস সন্ধ্যার সময় সকলগুলি বাড়ীর সম্মুখে—রাস্তার উপর খেলা করিতেছিল, সন্ধ্যার পর সকলেই বাড়ীর ভিতর প্রবেশ করিল, কেবল মালতী নারী একটি সপ্তম বর্ষীয়া বালিকা তাহা-দিগের সহিত ফিরিল না। মালতী কিশোরী লালের পৌত্রী। দেখিতে বেশ সুশ্রী, গৌরান্বী, তাহার পরিধানে একখানি অর্ধ ময়লা কালা পেড়ে সাড়ী, দুই হাতে বার গাছি সোণার চুড়ি।

ক্রমে মালতীর খোঁজ পড়িল, বাড়ীর নানা স্থানে, বাড়ীর বাহিরে, প্রতিবেশীগণের গৃহে গৃহে তাহার অনুসন্ধান হইল, কিন্তু কোন স্থানে তাহাকে দেখিতে পাওয়া গেল না। অপর বালক বালিকাগণ যাহারা তাহার সহিত একত্রে খেলা করিতেছিল, তাহাদিগকে জিজ্ঞাসা করায়, তাহাদিগের মধ্যে যাহারা একটু বড়, তাহারা কহিল, সে ফুলের খেলনা লইবার নিমিত্ত একটি ভদ্র-লোকের সঙ্গে গাড়ী করিয়া চলিয়া গিয়াছে। কিন্তু তাহারা ফুলের খেলনা পাইয়াছে। উহাদিগের এই কথা কেহই সম্পূর্ণরূপে বুঝিয়া

উর্গিতে পারিল না, কেবল এইমাত্র বুঝিতে পারিল যে কোন ব্যক্তি ফুলের খেলনা বালক-বালিকাগণকে প্রদান করিয়াছেন ও সেই ফুলের খেলনার লোভ দেখাইয়া মালতীকেও ভুলাইয়া লইয়া গিয়াছেন।

মালতী রায় বাহাদুরের পৌত্রী, তিনি তাহাকে অতিশয় ভালবাসিয়া থাকেন। তিনি নিজেও তাহার লোকজনকে লইয়া সমস্ত রাত্রি মালতীর অনুসন্ধান করিলেন। স্থানীয় পুলিশে এই সংবাদ প্রদান করিয়া তাঁহাদিগের সাহায্য গ্রহণ করিলেন। তাঁহাদিগের সাহায্যেও মালতীর বিশেষ রূপ অনুসন্ধান করা হইল, কিন্তু তাহার কোনরূপ সন্ধান পাওয়া গেল না। সহর ও সহরতলীর সমস্ত থানায় সংবাদ লওয়া হইল, কোন থানাতেই মালতীকে পথভ্রান্ত অবস্থায় আনীত হয় নাই।

এইরূপ অনুসন্ধান করিয়া যখন মাল-তীকে কোন স্থানেই পাওয়া গেল না, তখন রায় বাহাদুর ও মালতীর পিতা একেবারে অস্থির হইয়া পড়িলেন। মালতীর মাতা ও পিতামহী, অশ্রুজল পরিত্যাগ করিয়া রায় বাহাদুরের অন্তরমহল ক্রন্দনে বিদীর্ণ করিতে লাগিলেন। অপরাপর জীলোক-গণও নিতান্ত মন্বাহত হইয়া কোনরূপে চক্ষুজল সংবরণ করিয়া, গৃহকার্য্য করিতে লাগিলেন সত্য, কিন্তু কোনরূপেই মনকে প্রবোধ দিতে পারিলেন না।



মালতী মালতীপুষ্পের স্তায় অতি যত্নে প্রতিপালিতা হইয়া এত বড়ী হইয়াছে, পিতা মাতাকে ছাড়িয়া কখন কোন স্থানে সে রাত্রিবাস করে নাই, কষ্টের লেশ কাহাকে বলে, সে তাহা কখন জানিতে পারে নাই। এখনও পর্য্যন্ত সে হাতে করিয়া আহার করিতে শিখে নাই। সে এখন এত বড়ী হইয়াছে, তথাপি তাহার মাতা নিজ হস্তে তাহাকে আহার করাইয়া থাকেন। এরূপ অবস্থায় মালতী যে কত কষ্টভোগ করিতেছে, তাহা ভাবিয়া তাহার পিতা মাতা ক্রমে আরও অস্থির হইয়া পড়িলেন।

মালতীকে অনুসন্ধান করিবার নিমিত্ত যে সকল লোক চারিদিকে প্রেরিত হইয়াছিল, ক্রমে ক্রমে সকলেই প্রত্যাবর্তন করিল কিন্তু কেহই তাহার কোনরূপ সন্ধান আনিতে পারিল না। প্রত্যেক থানা হইতে সংবাদ পাওয়া গেল, মালতী সেখানে নাই। যখন কোন স্থানেই মালতীকে পাওয়া গেল না, তখন মালতীর শোকে রায় বাহাদুর একেবারে অস্থির হইয়া পড়িলেন, অনন্যোপায় হইয়া তিনি পুলিশের সর্ব প্রধান কর্মচারীর সহিত সাক্ষাৎ করিলেন।

সর্বপ্রধান কর্মচারীর সহিত পূর্ব হইতেই রায় বাহাদুরের পরিচয় ছিল। তিনি তাঁহার সহিত সাক্ষাৎ করিয়া মালতীর হঠাৎ নিরুদ্দেশের কথা তাঁহাকে কহিলেন। বেরূপে সে হঠাৎ নিরুদ্দেশ হইয়াছে, তাহার

সম্মুখী অপর বালকবালিকাগণ, তাঁহাকে সেই অপরিচিত বন্ধি কর্তৃক ফুলের খেলনা বিতরণ সম্বন্ধে যাহা যাহা বলিয়াছিল, তাহার সমস্তই কর্মচারীকে কহিলেন। সে যে একখানি ঠিকা গাড়ীতে ফুলের খেলনা লইবার নিমিত্ত উঠিয়াছিল, তাহাও তিনি তাঁহাকে কহিলেন। যাহাতে উপযুক্ত কর্মচারীর হস্তে মালতীর অনুসন্ধানের ভার অর্পিত হয় তাহার নিমিত্ত তাঁহাকে বিশেষ রূপ অনুরোধ করিলেন।

সর্বপ্রধান কর্মচারী রায় বাহাদুরের কথা শুনিয়া অতিশয় দুঃখ প্রকাশ করিলেন। যাহাতে মালতীকে পাওয়া যায় তাহার নিমিত্ত তিনি বিশেষরূপ মনোযোগী হইবেন। উপযুক্ত কোন ডিটেক্টিভ কর্মচারীর হস্তে তিনি মালতীর অনুসন্ধানের ভার অর্পণ করিবেন, বলিয়া তিনি রায় বাহাদুরকে বিদায় দিলেন। যাইবার সময় তাঁহাকে বলিয়া দিলেন, তিনি যে কর্মচারীকে এই কার্যে নিযুক্ত করিবেন, তিনি রায় বাহাদুরের বাড়ীতে গিয়া তাঁহার সহিত সাক্ষাৎ করিবেন। আরও বলিয়া দিলেন, তাঁহাকে যেন উপযুক্তরূপ সাহায্য প্রদান করা হয়।

প্রধান কর্মচারীর এই কথা শুনিয়া রায় বাহাদুর তাঁহাকে বার বার ধন্যবাদ প্রদান করিয়া আপন গৃহাভিমুখে প্রস্থান করিলে

## পঞ্চম পরিচ্ছেদ ।

রায় বাহাদুরকে বিদায় দিয়া সর্বপ্রধান কর্মচারী সাহেব, সুপ্রসিদ্ধ ডিটেক্টিভ কর্মচারী প্রসন্নকুমারকে ডাকাইয়া পাঠাইলেন । সংবাদ পাইনামাত্র তিনি আসিয়া সাহেবের সম্মুখে উপস্থিত হইলেন । রায় বাহাদুর মালতীর হঠাৎ নিকৃৎশ ৩৩য়া সম্বন্ধে তাঁহাকে যাহা যাহা বলিয়াছিলেন, তাহার সমস্তই তিনি প্রসন্নকুমারকে কহিলেন ও বাহাতে মালতীকে পাওয়া যয় তাহার নিমিত্ত তাঁহাকে বিশেষরূপে চেষ্টা করিবার আদেশ করিলেন । রায় বাহাদুরের সহিত প্রথমে সাক্ষাৎ করিয়া, তাঁহার নিকট সমস্ত অবস্থা বিশেষরূপে অবগত হইয়া, কার্যক্ষেত্রে প্রবিষ্ট হইবার আদেশ প্রদান করিলেন ?

সর্বপ্রধান কর্মচারীর আদেশ প্রাপ্ত হইয়া প্রসন্নকুমার, আর কালবিলম্ব না করিয়া, সেই স্থান হইতেই একেবারে রায় বাহাদুরের বাড়ীতে গিয়া উপস্থিত হইলেন । অতি অল্পকণ পূর্বেই রায় বাহাদুরও তাঁহার নিজবাড়ীতে প্রত্যাগমন করিয়াছিলেন । ডিটেক্টিভ প্রসন্নকুমারের আগমন সংবাদ পাইয়া তিনি তৎক্ষণাৎ তাঁহার সহিত সাক্ষাৎ করিলেন ও এ পর্য্যন্ত যাহা কিছু অবগত হইতে পারিয়াছিলেন, তাহার সমস্তই তাঁহার নিকট প্রকাশ করিলেন । প্রসন্নকুমার রায়

বাহাদুরের সমস্ত কথা স্থির ভাবে শ্রবণ করিয়া কহিলেন, 'আপনি বালকবালিকা-গণের নিকট হইতে যতদূর অবগত হইতে পারিয়াছেন, তাহার সমস্তই আমাকে বলিলেন সত্য, তথাপি আমি উহাদিগকে একবার নিজে দেখিয়া দুই চারিটা কথা জিজ্ঞাসা করিতে চাই ।'

প্রসন্নকুমারের কথা শুনিয়া, রায় বাহাদুর সেই সকল বালক-বালিকাগণকে সেই স্থানে আনিবার নিমিত্ত একটা পরিচারকে পাঠাইয়া দিলেন । সে কিছুকণ পরে উহাদিগের সকলকে লইয়া সেই স্থানে আসিয়া উপস্থিত হইল । প্রসন্নকুমার উহাদিগের সকলকে বিশেষরূপ লক্ষ্য করিয়া দেখিলেন ও তাহাদিগকে দুই চারিটা বাজে কথা জিজ্ঞাসা করিয়া বুঝিয়া লইলেন, উহাদিগের মধ্যে কে অতুহর—কে চতুর, ও কে তাঁহার কথার যথাযথ উত্তর প্রদান করিতে সমর্থ হইবে ।

উহাদিগের মধ্যে একটা পঞ্চম বর্ষীয়া বালিকা ছিল, তাহাকেই চতুরা বলিয়া বোধ হইল । প্রসন্নকুমার তাহাকে জিজ্ঞাসা করিলেন, তোদেরা সকলে কোথায় খেলা করিতেছিলে ।

বালিকা । আমরাদিগের বাড়ীর সম্মুখে রাস্তার উপর ।

প্রসন্ন । কে তোমাদিগকে ফুলের খেলনা দিয়াছিল ?



বা । একটা লোক ।

প্র । সে খেলনা কোথায় পাইল ?

বা । তাহার হাতে ছিল ।

প্র । সে কাহাকে প্রথমে খেলনা দেয় ?

বা । তাহা আমার ঠিক মনে নাই ?

কিন্তু একে একে আমাদের সকলকেই  
সে খেলনা দিয়াছিল ?

প্র । তোমরা তাহার গাড়ীর নিকট  
গিয়াছিলে ?

বা । গিয়াছিলাম ।

প্র । কে কে গিয়াছিলে ?

বা । আমরা সকলেই গিয়াছিলাম ।

প্র । মালতী ?

বা । সেও গিয়াছিল । তাহাকে সেই  
ব্যক্তি গাড়ীর ভিতর হইতে খেলনা লইতে  
বলে ।

প্র । মালতী গাড়ীর ভিতর গিয়াছিল ?

বা । সে গাড়ীর ভিতর খেলনা লইবার  
নিমিত্ত গমন করে, কিন্তু আর নামিতে  
পারে না, গাড়ী চলিয়া যায় ।

প্র । সে ব্যক্তি তখন কোথায় ছিল ?

বা । সে তখন গাড়ীর ভিতর  
বসিয়াছিল ।

প্র । সে মালতীকে গাড়ী হইতে  
লামাইয়া দেয় নাই ?

বা । না ।

প্র । যখন গাড়ী চলিয়া গেল, তখন  
তোমরা কোথায় ছিলে ?

বা । আমরা সেই গাড়ীর নিকটেই  
ছিলাম ।

প্র । গাড়ী চলিয়া যাওয়ার সময় যখন  
মালতী নামিতে পারিল না, তখন তোমরা  
কি করিলে ?

বা । আমরা গাড়ীর পশ্চাৎ পশ্চাৎ  
কিছু দূর গিয়াছিলাম, কিন্তু গাড়ী থামিল  
না, চলিয়া গেল ; আমরাও ফিরিয়া  
আসিলাম ।

প্র । যে স্থানে গাড়ী দাঁড়াইয়া ছিল ও  
যে স্থানে মালতী গাড়ীর ভিতর প্রবেশ  
করিয়াছিল, সেই স্থান তুমি আমাকে দেখা-  
ইয়া দিতে পারিবে ?

বা । পারিব, আপনি আমার সঙ্গে  
চলুন, আমি এখনই তাহা আপনাকে দেখা-  
ইয়া দিতেছি ।

প্র । যে লোকটা তোমাদিগকে ফুলের  
খেলনা দিয়াছিল, তাহাকে দেখিলে তুমি  
চিনিতে পারিবে ?

বা । পারিব ।

প্র । সে লোকটা দেখিতে কেমন  
বলিতে পার ?

বা । দরওয়ানের মতন ।

প্র । তুমি এখন আমার সহিত আইস  
ও যে স্থানে সেই গাড়ীখানি দাঁড়াইয়া ছিল,  
তাহা আমাকে দেখাইয়া দাও ।

প্রসন্নকুমারের কথা শুনিয়া বালিকা  
তাঁহার সহিত গমন করিল ও যে স্থানে

যাগতী গাড়ীর ভিতর প্রবেশ করিয়াছিল, সেই স্থানটী তাঁহাকে দেখাইয়া দিল ।

যে স্থানে গাড়ীখানিকে দাঁড় করাইয়া রাখা হইয়াছিল, সেই স্থানের রাস্তা খুব প্রশস্ত ছিল না, কোন গতিকে দুইখানি গাড়ী সেই স্থান দিয়া যাতায়াত করিতে পারে । উহার নিকটে কোনরূপ দোকানও ছিল না, ঐ রাস্তার দুই পার্শ্বে কতকগুলি গৃহস্থের পাকা বাড়ী ।

প্রসন্নকুমার ঐ স্থানের প্রত্যেক বাড়ীর কর্তাকে জিজ্ঞাসিলেন, ঐ স্থানে একখানি গাড়ী দাঁড়াইয়া থাকিতে কেহ দেখিয়াছেন কি না, বা একখানি গাড়ীর পশ্চাৎ পশ্চাৎ কতকগুলি ছোট ছোট বালক-বালিকাকে কেহ দৌড়াইয়া যাইতে দেখিয়াছেন কি না? কিন্তু কাহাবও নিকট প্রথমত তিনি কিছুই সহজতর পাইলেন না । এইরূপে জিজ্ঞাসা করিতে করিতে তিনি আরও একটু দূরে গমন করিলেন, সেই স্থানে একটী যুবকের সহিত তাঁহার সাক্ষাৎ হইল, তাঁহার নিকট হইতে প্রসন্নকুমার জানিতে পারিলেন যে, সেই দিবস সন্ধ্যার সময় তাঁহার একখানি ভাড়াটিয়া গাড়ীর প্রয়োজন হয়, তিনি গাড়ী আনিবার নিমিত্ত সদর রাস্তায় গমন করিতে-ছিলেন. এমন সময় দেখিতে পান, ঐ গলির ভিতর একখানি দ্বিতীয় শ্রেণীর গাড়ী দাঁড়াইয়া আছে । ঐ গাড়ী খালি আছে কি না, ও উহা ভাড়া যাইবে কি না, তাহাই

আনিবার নিমিত্ত তিনি ঐ গাড়ীর নিকট গমন করেন ও দেখিতে পান, উহার ভিতর কতকগুলি ফুলের খেলনা আছে । ভাড়ায় যাইবে কি না, জিজ্ঞাসা করায়, কোচমান কহে, তাহার গাড়ীতে একটী বাবু আসিয়াছেন, তাঁহারই অপেক্ষায় দাঁড়াইয়া আছি, অপর ভাড়া যাইবার উপায় নাই ।

প্রসন্নকুমার তাহাকে আরও দুই চারিটা কথা জিজ্ঞাসা করিয়া জানিতে পারিলেন, ঐ গাড়ীতে দুইটী লাল রঙের ঘোড়া ছিল, তিনি ঠিক বলিতে না পারিলেও তাঁহার বোধ হয়, ঐ গাড়ীর নম্বর ৫০৪ বা ৪০৫ হইবে ।

যুবকের নিকট হইতে প্রসন্নকুমার যাহা অবগত হইলেন, তাহাতে তিনি বৃত্তিতে পারিলেন, বালক-বালিকাগণ যাহা বলিয়াছে, তাহা প্রকৃত । আরও মনে করিলেন, ঐ নম্বর লইয়া অনুসন্ধান করিলে হয়ত তিনি ঐ গাড়ীর চালককে পাইলেও পাইতে পারিবেন ।

মনে মনে এইরূপ স্থির করিয়া যথা সময়ে তিনি মিউনিসিপ্যাল আফিসে গিয়া উপস্থিত হইলেন । সেই স্থান হইতে ৫০৪ ও ৪০৫ উভয় নম্বরের গাড়ীর অধিকারী ও তাহাদিগের ঠিকানা জানিয়া লইয়া তাহাদিগের অনুসন্ধান করিতে প্ররত্ত হইলেন । একটু বিশেষরূপ অনুসন্ধান করিবার পরই উভয় গাড়ীর অধিকারীকে

প্রাপ্ত হইলেন। জিজ্ঞাসাবাদ করিয়া জানিতে পারিলেন, ৫০৪ নম্বরের গাড়ী দুইটি লাল ঘোড়ার দ্বারা চালান হইয়া থাকে। সেই সময় ঐ গাড়ীর চালক সেই স্থানে উপস্থিত ছিল না। গাড়ী লইয়া ভাড়া খাটাইবার নিমিত্ত সে বাহিরে গিয়াছিল। কখন যে সে প্রত্যাগমন করিবে, তাহার নিশ্চয়তা নাই। সুতরাং প্রসন্নকুমার মনে মনে ভাবিলেন, এখন অপর গাড়ীখানির সন্ধান করা যাক, আবশ্যিক হয় পুনরায় আসিয়া ঐ গাড়োয়ানের সহিত সাক্ষাৎ করিবে।

মনে মনে এইরূপ ভাবিয়া প্রসন্নকুমার যেমন সেই স্থান হইতে বাহির হইবেন, অমনি দেখিতে পাইলেন, ৫০৪ নম্বরের গাড়ী ফিরিয়া আসিতেছে। সুতরাং তখন অপর গাড়ীর অনুসন্ধান তঁাহাকে আর যাইতে হইল না।

কোচমান আস্তাবলে গাড়ী আনিয়া গাড়ী হইতে ঘোড়া দুইটি খুলিয়া দিল। সহিস ঘোড়া লইয়া সেই স্থান হইতে প্রস্থান করিল।

## ষষ্ঠ পরিচ্ছেদ ।

পাঠকগণ ইহার পূর্বে হইতেই অবগত আছেন যে, যে গাড়ী করিয়া মালতীকে

স্থানান্তরে লইয়া যাওয়া হইয়াছিল, সেই গাড়ীর কোচমানও একজন বদমায়েস ও সেই ষড়যন্ত্রকারিগণের মধ্যে একজন।

প্রসন্নকুমার এই গাড়োয়ানকে চিনিতে নাই, গাড়োয়ান কিন্তু প্রসন্নকুমারকে উত্তমরূপে চিনিত। চালক প্রসন্নকুমারকে দেখিয়া এরূপ কোন ভাষা প্রকাশ করিল না, যাগতে বুঝিতে পারা যায় যে, সে প্রসন্নকুমারকে চিনে।

প্রসন্নকুমার ঐ আস্তাবলের ভিতর এক খানি দড়ির খাটিয়ার উপর সেই সময় বসিয়া ছিলেন। আস্তাবলের অধিকারী অনুগ্রহ করিয়া তঁাহার বসিবার নিমিত্ত ঐ খাটিয়াখানি আনিয়া দিয়াছিলেন।

প্রসন্নকুমার সেই কোচমানকে তঁাহার সন্নিকটে ডাকিলেন। কোচমান বিনা বাক্য ব্যয়ে তঁাহার সন্মুখে আসিয়া দণ্ডায়মান হইল। প্রসন্নকুমার তাহার দিকে লক্ষ্য করিয়া কহিলেন, “আমি তোমাকে দুই একটা কথা জিজ্ঞাসা করিতে ইচ্ছা করি, তুমি তাহার যথাযথ উত্তর প্রদান করিবে কি?”

কোচমান।—কেম করিব না? আপনি আমাকে যাহা জিজ্ঞাসা করিবেন, আমি যতদূর অবগত আছি, তাহা আপনাকে বলিব।

প্রসন্ন। তোমার মনে হয় কি, আজ তিন চারি দিবস হইল, একটা লোক

তোমার গাড়ী ভাড়া করিয়া কতকগুলি ফুলের খেলনা লইয়া কোন একটা গলির ভিতর কিয়ৎক্ষণ দাঁড়াইয়া থাকে ? পরিশেষে একটা বালিকাকে সেই গাড়ীতে লইয়া সে কোথায় চলিয়া যায় ।

কোচমান । হাঁ, মনে হয় ।

প্র । সে তোমার পরিচিত ?

কো । না ।

প্র । সে কোথায় থাকে বলিতে পার ?

কো । না, তাহা জানি না ।

প্র । সে তোমার গাড়ী কোথা হইতে ভাড়া করিয়াছিল ?

কো । আমি বড় রাস্তায় গাড়ীর আড়ায় ভাড়ার জন্ত অপেক্ষা করিতেছিলাম, সেই স্থান হইতে সে আমার গাড়ী ঘণ্টা হিসাবে ভাড়া করিয়া লয় ।

প্র । তাহার সহিত আর কেহ ছিল ?

কো । না ।

প্র । সে ফুলের খেলনা কোথায় পাইল ?

কো । গাড়ী ভাড়া করিবার পূর্বে সে উহা কোথা হইতে লইয়া আসিয়াছিল ।

প্রসন্নকুমারের এতগুলি প্রশ্নের উত্তরে কোচমান যাহা যাহা কহিল, তাহা একটাও প্রকৃত কথা নহে, সমস্তই মিথ্যা । কারণ কোচমান তাঁহাকে উত্তমরূপে চিনিত ।

প্র । তোমার গাড়ীতে করিয়া সে একটা বালিকাকে হইয়া গিয়াছিল ?

কো । গিয়াছিল ।

প্র । কোথায় লইয়া গিয়াছিল ?

কো । একটা বাড়ীতে ।

প্র । সে বাড়ীটা কোথায় ?

কো । সেই স্থানের নাম আমি জানি না ।

প্র । আমাকে সেই বাড়ীটা দেখাইয়া দিতে পার ?

কো । পারি ।

প্র । সে পাকা বাড়ী না খোলার বাড়ী ?

কো । পাকা বাড়ী ।

প্র । কি প্রকার স্থানে ঐ বাড়ীটা স্থাপিত ?

কো । একটা বাগানের ভিতর ।

প্র । ঐ বাগানের ভিতর গাড়ী যায় ?

কো । যায় ।

প্র । বালিকাটিকে কি তুমি ঐ বাড়ীতেই রাখিয়া আইস ?

কো । হাঁ ।

প্র । আর ঐ ব্যক্তি ?

কো । সেও ঐ বাড়ীতে থাকে ?

প্র । তোমার গাড়ীতে করিয়া কোন ব্যক্তি সেই স্থান হইতে আসে নাই ?

কো । না, আমি খালি গাড়ী লইয়া সেই স্থান হইতে ফিরিয়া আসি ।

প্র । তুমি সেই স্থানে গাড়ী হইতে নামিয়াছিলে ?

কো । আজ্ঞে হাঁ ।

প্র । তুমি গাড়ী ছাড়িয়া কেন নামিলে ?

কো। গাড়ীতে যে ফুলের খেলনা ছিল, তাহাই দিবার নিমিত্ত গাড়ী হইতে নামিয়াছিলাম।

প্র। কোন্ স্থানে তুমি ঐ সকল খেলনা রাখিয়া আসিয়াছিলে ?

কো। যে ঘরে ঐ ব্যক্তি ঐ বালিকাকে লইয়া গিয়াছিল, সেই ঘরে আমি ঐ খেলনা রাখিয়া আসিয়াছিলাম।

প্র। ঐ বাড়ী ও ঐ ঘরটী আমাকে দেখাইয়া দিতে পারিবে ?

কো। কেন পারিব না, যাহা একবার দেখিয়াছি, তাহা কি আর কখন ভুলি ?

এবার কোচমান যে কয়েকটী উত্তর প্রদান করিল, তাহার একটীও মিথ্যা নহে। কিন্তু ইহার পর প্রসন্নকুমার তাহাকে আর যে দুই একটী কথা জিজ্ঞাসা করিলেন, সে তাহার প্রকৃত উত্তর প্রদান করিল না।

প্র। ঐ বাড়ীতে আর কাহাকেও দেখিয়াছিলে ?

কো। না—আর কাহাকেও আমি ঐ বাড়ীতে দেখি নাই।

প্র। বালিকাটীকে যখন গাড়ী করিয়া আনা হইয়াছিল, বা যখন তাহাকে ঐ ঘরের ভিতর লইয়া যাওয়া হয়, তখন সে বোধ হয় খুব কাঁদিয়াছিল ?

কো। না, তাহাকে কাঁদিতে ত দেখি নাই !

প্র। যে লোকটী তোমার গাড়ী ভাড়া

করিয়া বালিকাটীকে লইয়া আসে, তাহাকে দেখিয়া কোন্ দেশীয় লোক বলিয়া বিবেচনা হয় ?

কো। সে বাঙ্গালী বাবু, ভদ্রলোক বলিয়া বোধ হয়।

প্র। সে বালিকা সম্বন্ধে তোমাকে কি কিছু বলিয়াছিল ?

কো। সে কহে, ঐ বালিকাটী তাহার কন্যা।

কোচমানের সহিত এই সকল কথা-বার্তার পর প্রসন্নকুমার তাহাকে সেই বাড়ীতে দেখাইয়া দিতে কহিলেন।

কোচমান তাঁহার প্রস্তাবে সম্মত হইল।

## সপ্তম পরিচ্ছেদ।

প্রসন্নকুমার একজন অতিশয় সাহসী পুরুষ, তিনি কখন কোনরূপ বিপদকে ভয় করিতেন না, যে স্থানে একাকী গমন করিলে তাঁহাকে বিপদে পতিত হইতে হইবে বঝিতে পারিতেন, অথচ উপস্থিত মত সেই সময়ে কাহারও কোনরূপ সাহায্য গ্রহণ করিবার সুযোগ বা সময় পাইতেন না, সেইস্থানে যাইতে তিনি কখনও পশ্চাৎপদ হইতেন না। এইরূপে অনেকবার তিনি অনেক স্থানে গমন করিয়া অনেক কার্যো হস্তক্ষেপ করিয়াছেন ও অনেকবার বিশেষ-

রূপ বিপদগ্রস্তও হইয়াছেন, আবার নিজের বুদ্ধিবলে ও সময় সময় অপরের সাহায্যে তিনি সেই বিপদ হইতে মুক্তিলাভও করিয়াছেন, কিন্তু এ পর্য্যন্ত তাঁহার সেই স্বভাবের কিছুমাত্র পরিবর্তন হয় নাই ।

তিনি যে সময় আস্তাবলে অনুসন্ধান করিবার নিমিত্ত গমন করিয়াছিলেন, সেই সময় তাঁহার সহিত আর কেহই ছিল না, তিনি একাকীই সেই স্থানে গমন করিয়াছিলেন । কোচমান যখন তাঁহাকে সেই বালিকা সম্বন্ধে সংবাদ প্রদান করিল, তখনও তিনি একাকী । সেই অবস্থায় সেই কোচমানের সঙ্গে সে যেখানে বালিকাকে লইয়া গিয়াছিল, সেই স্থানে একাকী গমন করিতে সন্মত হইলেন ।

কোচমান কি চরিত্রের লোক তাহা তিনি জানিতেন না, কোচমান কি অভিপ্রায়ে তাঁহার সহিত তখনই গমন করিতে সন্মত হইল, তাহাও তিনি একটু বিশেষরূপ বিবেচনা করিয়া দেখিলেন না । বালিকাকে বাহারা অপহরণ করিয়া লইয়া গিয়াছে, তাহাদিগের মনে যে নিশ্চয়ই কোনরূপ কু-অভিসন্ধি আছে,—সেই স্থানে, সেই সময়, সেই অবস্থায় একাকী গমন করা কর্তব্য কি না, তাহাও একবার না ভাবিয়া তিনি সেই কোচমানকে সঙ্গে লইয়া তখনই সেই স্থান হইতে বহির্গত হইলেন । অনেক দূর গমন করিতে হইবে জানিয়াও, তিনি সেই আস্তা-

বল হইতে কোন গাড়ী ভাড়া করিয়া লইবার চেষ্টা করিলেন না, কোচমানকে সঙ্গে লইয়া সেই আস্তাবল হইতে বহির্গত হইলেন । কিছু দূর গমন করিবার পর রাস্তা হইতে একখানি গাড়ী ভাড়া করিলেন । ঐ গাড়োয়ান প্রসন্নকুমারকে চিনিও । উভয়েই ঐ গাড়ীতে আরোহণ করিয়া গন্তব্য স্থানাভিমুখে গমন করিতে লাগিলেন ।

প্রসন্নকুমার আস্তাবল হইতে গাড়ী ভাড়া না করিয়া, রাস্তা হইতে যে কেন গাড়ী ভাড়া করিলেন, তাহার কারণ প্রসন্নকুমারই জানেন । আমরা কেবল এইমাত্র অনুমান করিতে পারি যে, হয়ত সেই আস্তাবলের কোচমানগণকে তিনি কোনরূপে বিদ্ধান করিতে সাহস করেন নাই, নতুবা তিনি ভাবিয়াছিলেন, তাঁহার পরিচিত কোন গাড়োয়ানের গাড়ী ব্যতীত অপর কোন গাড়ীতে তিনি আরোহণ করিয়া ঐ কার্যে গমন করিবেন না ।

অনেক কোচমান প্রসন্নকুমারের পরিচিত ছিল, প্রসন্নকুমার তাহাদিগের কাহাকেও ডাকিলে, অপর লাভজনক ভাড়া পরিত্যাগ করিয়া, প্রসন্নকুমারের নিকট ছুটিয়া আসিত ।

কলিকাতা সহরের কোচমান মাত্রই ভাল লোক নহে, উল্লেখ্য অযোগ্য পাইলে চূড়ান্ত বদমাহুসি করিতে ক্রটা করে না, ইহা পাঠকগণের মধ্যে প্রায় সকলেই অব-

গত আছেন। প্রসন্নকুমারও উহাদিগকে উত্তমরূপে চিনেন। তবে তাঁহার পরিচিত কোচমানগণ তাঁহার ওরূপ বণীভূত কেন? প্রসন্নকুমার যখন যে গাড়ীতে যে অনুসন্ধান গমন করেন, তাহার কার্য সম্পন্ন হইলে, ব কোচমান কর্তৃক বিশেষরূপ সাহায্য প্রাপ্ত হইলে তিনি দুই টাকা ভাড়ার স্থলে পাঁচ টাকা প্রদান করিয়া থাকেন। সময় সময় আরও অধিক পরিমাণে বকসিস্ দিয়া থাকেন বলিয়াই কোচমানগণ তাঁহার ভাড়া পাইলে অপর কাহারও নিকট গমন করে না।

গাড়ী ক্রমে কাঁকুড়গাড়িতে গিয়া উপস্থিত হইল। যে বাগানের উদ্দেশ্যে তিনি গমন করিতেছিলেন, গাড়ী গিয়া সেই বাগানের সম্মুখে উপস্থিত হইল। যে কোচমান তাঁহাকে সঙ্গে করিয়া সেই স্থানে লইয়া গিয়াছিল, সে গাড়ী হইতে অবতরণ করিয়া প্রসন্নকুমারকে সঙ্গে লইয়া সেই জঙ্গলময় বাগানের অভিতর প্রবেশ করিল। যে গাড়ীতে তাঁহারা সেই স্থানে আগমন করিয়াছিলেন, সেই গাড়ীর কোচমান তাহার গাড়ী লইয়া সেই স্থানে অপেক্ষা করিতে লাগিল।

যে গাড়ী করিয়া মালতীকে অপহরণ করিয়া আনা হইয়াছিল, সেই গাড়ীর কোচমান প্রসন্নকুমারকে সঙ্গে লইয়া জঙ্গলময় ও অপরিষ্কার বাগানের মধ্য দিয়া কিছুকণ

গমন করিয়া সেই গৃহের সম্মুখে গিয়া উপস্থিত হইল। প্রসন্নকুমার ঐ গৃহের চারিদিক একবার উত্তমরূপে নিরীক্ষণ করিলেন, কিন্তু অপর কোন ব্যক্তি তাঁহার নয়নগোচর হইল না। কোচমান প্রসন্নকুমারকে সঙ্গে লইয়া দুই তিনটি প্রকোষ্ঠ অতিক্রম করিয়া একটি প্রকোষ্ঠের সম্মুখে গিয়া উপস্থিত হইল ও ঐ প্রকোষ্ঠটি দেখাইয়া দিয়া কহিল, ইহার মধ্যে বালিকাটিকে রাখা হইয়াছিল।

কোচমানের কথা শুনিয়া প্রসন্নকুমার ঐ ঘরটির অবস্থা একবার বাহির হইতে উত্তমরূপে দেখিলেন, সম্মুখ হইতে ঐ ঘরে প্রবেশ করিবার কেবল একটি মাত্র দরজা ভিন্ন অপর আনান্না দরজা প্রভৃতি আর কিছুই দেখিতে পাইলেন না। ঐ প্রকোষ্ঠে প্রবেশ করিবার যে দরজাটি দেখিতে পাইলেন, তাহার কপাট খুব দৃঢ় ও মোটা কাঠে নিশ্চিত, এরূপ কপাট প্রায় সচরাচর কোন গৃহে বা বাগানবাড়ীতে দেখিতে পাওয়া যায় না। চোর ডাকাইতের হস্ত হইতে ধন বা বহুমূল্য দ্রব্যাদি রক্ষা করিবার মানসে পূর্বে কেহ কেহ আপন বাসস্থানে এইরূপ দুই একটি প্রকোষ্ঠ প্রস্তুত করিয়া রাখিতেন। দহ্মাগণ মনে করিলে ঐ দরজা ভাঙ্গিয়া উহার মধ্যে সহজে প্রবেশ করিতে পারিত না। ঐ দরজার বাহিরে আর একটি লৌহনির্মিত দরজা ছিল। ঐ ঘর



বন্ধ করিতে হইলে প্রথমত কাষ্ঠ নির্মিত দরজা বন্ধ করিতে হইত, তাহার পর ঐ লৌহনির্মিত দরজা বন্ধ করা হইত। প্রসন্ন-কুমার যখন সেই স্থানে উপস্থিত হইলেন, সেই সময় ঐ ঘরের লৌহ নির্মিত দরজা খোলা ছিল, কাষ্ঠ নির্মিত দরজাতেও কোন রূপ তালা আবদ্ধ ছিল না, কেবল ভেজান ছিল মাত্র।

কোচমান প্রসন্নকুমারকে ঐ প্রকোষ্ঠটি দেখাইয়া দিলে তিনি সজোরে ঐ কাষ্ঠের দরজাটি ঠেলিলেন, দরজা খুলিয়া গেল। সেই সঙ্গে অল্পবয়স্ক বালিকার করুণ অথচ ভয় কণ্ঠস্বর তাঁহার কর্ণে প্রবেশ করিল। প্রসন্নকুমার আর কোন দিকে লক্ষ্য না করিয়া বা তাঁহার সঙ্গী কোচমানকেও কোন কথা না বলিয়া একেবারে সেই প্রকোষ্ঠের ভিতর প্রবেশ করিলেন। সেই সঙ্গে সঙ্গে ঐ কাষ্ঠ নির্মিত দরজা বাহির হইতে বন্ধ হইয়া গেল।

### অষ্টম পরিচ্ছেদ ।

প্রসন্নকুমার যখন বাহিরে ছিলেন, সেই সময় তাঁহার সঙ্গী কোচমানকে ভিন্ন আর অপর কোন ব্যক্তিকে তিনি সেই স্থানে দেখিতে পান নাই। কিন্তু দরজা বন্ধ করিবার সময় হই তিনজনকে দেখিতে

পাইলেন। তিনি বিশেষরূপ বিগদ-গ্রস্ত বৃত্তিতে পারিয়া, বাহ্যতে ঐ দরজা বাহির হইতে বন্ধ করিতে না পারে, এই আশায়, তিনি ভিতর হইতে জোর করিয়া টানিয়া ধরিলেন, কিন্তু যাহারা বাহির হইতে দরজা বন্ধ করিতেছিল, তাহাদিগকে পরাস্থ করিতে পারিলেন না। বা কোন গতিকে বাহিরে আসিতেও পারিলেন না। দরজা বাহির হইতে বন্ধ হইয়া গেল, তিনি সেই প্রকোষ্ঠের মধ্যে বন্দী হইলেন। কে যে তাঁহাকে বন্দী করিল, ও কেনই বা তিনি সেই স্থানে বন্দী হইলেন তাহার কিছুই বুঝিয়া উঠিতে পারিলেন না। যে কোচমান তাঁহাকে সঙ্গে করিয়া সেই স্থানে আনিয়াছিল, সেও এই কার্যে মিলিত আছে কি না, তাহাও ভাবিয়া তিনি কিছুমাত্র স্থির করিয়া উঠিতে পারিলেন না। বালিকার স করুণ ভয় কণ্ঠস্বর তখনও পর্যন্ত তাঁহার কর্ণগোচর হইতে লাগিল।

ঐ ঘরের দরজা বন্ধ হইয়া গেলে, উহার ভিতর একরূপ অন্ধকার হইল যে, তিনি নিজে নিজেকে পর্যন্ত আর দেখিতে পাইলেন না। তাঁহার পকেটে দেশালাই ছিল, তিনি তাহার দুই চারিটা কাটি জ্বালাইয়া ঐ ঘরের অবস্থা একবার দেখিয়া লইলেন। দেখিলেন, ঐ ঘরটা দৈর্ঘ্য ও প্রস্থে ১০ ফিট করিয়া হইবে। যে দরজা দিয়া তিনি ঐ ঘরের ভিতর প্রবেশ করিয়াছেন, উহা ব্যতীত ঐ ঘরের



অপর কোন জানালা বা দরজা নাই, শুদাম ঘরের ছায় একেবারে গাঁথিয়া তোলা ও ভিতরকার দেওয়ালে অনেক দিবসের চুণ বালি ধরাইয়া পলস্তারা করা হইলেও, এখনও পর্য্যন্ত উহার কোন স্থান কোনরূপ নষ্ট হয় নাই। মেজে হইতে প্রায় ১২ ফুট উপরে দুইটা দেওয়ালে দুইটা করিয়া গোল ফোকোর আছে, উহার পরিধি ৮ ইঞ্চির অধিক নহে। উহার মধ্য দিয়া একখানি হস্ত ও উত্তমরূপে প্রবিষ্ট করান যায় না। ঐ ঘরের মধ্যে দ্রব্যাদি কিছুই নাই, মেজের অবস্থা দেখিয়া বোধ হয়, উহা কাঁট দিয়া সম্প্রতি পরিষ্কার করিয়া রাখা হইয়াছে। ঘরের অবস্থা দেখিয়া প্রসন্নকুমার অতিশয় চিন্তিত হইলেন। যিনি কোনরূপ বিপদগ্রস্ত হইয়া কখন ভীত হন নাই, আজ তাঁহার নিজের অবস্থা দেখিয়া তাঁহার মনে বিশেষরূপ ভয়ের সঞ্চার হইল। তিনি মনে মনে ভাবিলেন, যদি অপর কেহ এই ঘর হইতে তাঁহাকে বাহির না করে, তাহা হইলে তিনি নিজে কোনরূপেই এই ঘর হইতে বাহির হইতে পারিবেন না, এই ঘরের মধ্যেই তাঁহার ইহজীবনের কার্য শেষ হইবে। তাঁহার কোন বন্ধু বান্ধব, স্ত্রী-পুত্র বা যে কর্মচারীগণের আস্থা তিনি সর্বদা প্রতিপালন করিয়া থাকেন, তাঁহাদিগের কাহারও সহিত আর তাঁহার সাক্ষাৎ হইবে না, ও কেহই জানিতে পারিবে না, যে তিনি কি অবস্থার ও কোথায়

তাঁহার জীবনের অবশিষ্ট কয়েক দিবস শেষ করিলেন। তাঁহার মনে এইরূপ ও অন্যান্য চিন্তা উদয় হওয়ার, তাঁহার চক্ষু দিয়া জল আসিল, তিনি সেই অন্ধকার গৃহের মধ্যে নিজ উত্তরীয় বস্ত্র দ্বারা আপন চক্ষুজল মোচল করিতে লাগিলেন।

বালিকার ভগ্নকণ্ঠ নিঃসৃত কোমল স্বর তখন পর্য্যন্ত প্রসন্নকুমারের কর্ণগোচর হইতে ছিল। তিনি বুঝিলেন, যাহার নিমিত্ত তিনি এই মহাবিপদে পতিত হইয়াছেন, তাঁহার ছায় সেই বালিকাও বিপদগ্রস্ত হইয়া তাঁহার ঘরের পার্শ্ববর্তী কোন ঘরে আবদ্ধ আছে ও তাহার রোদনধ্বনি তাহার ঘরের সেই ক্ষুদ্র গহ্বর দিয়া, আগমন করিয়া তাঁহার কর্ণে প্রবেশ করিতেছে। এ বালিকা যে তাঁহার পার্শ্বের ঘরে আবদ্ধ আছে, সে বিষয়ে আর কিছুমাত্র সন্দেহ নাই। কিন্তু কে তাহাকে সেই স্থানে আনিয়া আবদ্ধ করিল ও ঐ বালিকার উপর এরূপ অত্যাচার করিবার কারণই বা কি, তাহার কিছুমাত্র তিনি ভাবিয়া স্থির করিতে পারিলেন না। যাহাকে উদ্ধার করিতে আসিয়া তিনি এইরূপ বিপদগ্রস্ত হইয়াছেন, তাহাকে উদ্ধার করা দূরে থাকুক, কিরূপে নিজে এই বিপদ হইতে উদ্ধার হইতে পারিবেন, তাহারই চিন্তা করিতে লাগিলেন; কিন্তু ভাবিয়া চিন্তিয়া কিছুই স্থির করিয়া উঠিতে পারিলেন না। অনন্তোপায় হইয়া মনের হৃৎখে সেই অন্ধ-

কারের ঘরের মেজের উপর তিনি বসিয়া পড়িলেন ।

কিয়ৎকাল স্থিরভাবে সেই ঘরের মেজের উপর বসিয়া তিনি মনে মনে কেবল ঈশ্বরকে ডাকিতে লাগিলেন । তিনি যেরূপ বিপদ গ্রহ, তাহাতে ঈশ্বর যদি তাঁহাকে উদ্ধার করেন, তবেই তিনি উদ্ধার হইতে পারিবেন, নতুবা এ বিপদ হইতে উদ্ধার হইবার তাঁহার আর কোনরূপ আশা নাই । এইরূপ কতকাল তিনি সেই স্থানে বসিয়া অতিবাহিত করিলেন, পরিশেষে একবার তিনি গায়েখান করিলেন, দেশলাই জ্বালিয়া ঐ ঘরটা আর একবার দেখিলেন । পুনরায় দরজার নিকট আসিয়া উহা ভিতর হইতে জ্বরে টানিয়া দেখিলেন, কিন্তু উহা নড়াইতেও পারিলেন না । ঘরের দেওয়ালে কোন স্থান যদি কোনরূপে ভাঙ্গিবার উপায় করিতে পারেন, তাহারও চেষ্টা দেখিলেন ; কি ঙ্গ কোন স্থানে তাহারও কোনরূপ সুযোগ করিয়া উঠিতে পারিলেন না । তখন অনন্তোপায় হইয়া পুনরায় সেই ঘরের মেজের উপর গিয়া উপবেশন করিলেন । বসিয়া বসিয়া তিনি নিভাস্ত ক্রান্ত হইয়া পড়িলেন । তিনি পরিণাম ভাবিয়া ক্রমে হতাশ হইয়া পড়িলেন ও জীবনের আশা পরিত্যাগ করিয়া, নিজের উত্তরীয় বস্ত্র সেই ঘরের মেজের উপর বিছাইয়া তাহার উপর শুইয়া পড়িলেন । শুইয়া শুইয়া কত কি চিন্তা

করিতে লাগিলেন । নিজের চিন্তা, নিজের পুত্রের চিন্তা, বন্ধু-বান্ধবের চিন্তা, নিজের জীবনের চিন্তা প্রভৃতি কত চিন্তা আসিয়া তাঁহার মনে উদয় হইতে লাগিল । কতবার তাঁহার চক্ষু বহিয়া অশ্রুজল ঝড়িতে লাগিল, কতবার তিনি ঈশ্বরকে ডাকিতে লাগিলেন । এইরূপে যে কত সময় অতিবাহিত হইয়া গেল, তাহা তিনি জানিতে পারিলেন না, বৃষ্টিতে পারিলেন না যে, তিনি এইরূপে দিন যাপন করিতেছেন, কি রাত্রি অতিবাহিত করিতেছেন । বালিকাটির কণ্ঠস্বর কখন বা তাঁহার কর্ণগোচর হইতে লাগিল, কখন বা তাহার স্র একেবারেই শুনিতে পাইলেন না । এইরূপে সময় অতিবাহিত হইতে হইতে সর্কভূখ : ও সর্ককষ্ট নিবারিনী নিদ্রাদেবী আসিয়া তাঁহাকে আশ্রয় প্রদান করিলেন । তিনি সেই ঘরের মেজের উপর নিদ্রিত হইয়া পড়িলেন । কতকাল যে তিনি ঐ ভাবে ঐ স্থানে নিদ্রিত ছিলেন, তাহা বলিতে পারেন না । যে দিন তিনি ঐ ঘরে আবদ্ধ হইয়াছিলেন, এখনও সেই দিন চলিতেছে কি দুই চারি দিবস ও রাত্রি অতিবাহিত হইয়া গিয়াছে, তাহাও তিনি বৃষ্টিতে পারিলেন না । এখন তিনি অতিশয় ক্ষুধিত হইয়া পড়িয়াছেন, ক্ষুধা অপেক্ষা তৃষ্ণা আরও প্রবল, কিন্তু উহা নিবারণের কোনরূপ উপায় নাই । স্মৃতরাং অনন্তোপায় হইয়া সেই স্থানেই তিনি পড়িয়া রহিলেন ;

কখন চেতনা অবস্থায় কখন বা নিদ্রিত অবস্থায় সময় অতিবাহিত হইতে লাগিল ।

প্রসন্নকুমার বাহার গাড়ী ভাড়া করিয়া ঐ স্থানে আগমন করিয়াছিলেন, প্রসন্নকুমার গাড়ী হইতে অবতরণ করিয়া ষাইবার পর সেই গাড়ীর কোচমান প্রায় তিন চারি ঘণ্টা তাহার গাড়ী সেই স্থানে দাঁড় করাইয়া রাখে । পরে সে যখন দেখিল যে, প্রসন্নকুমার বা তাঁহার সঙ্গী লোকটী কেহই প্রত্যাগমন করিনেন না, তখন বাধ্য হইয়া সেই কোচমান তাহার গাড়ী সেই স্থানে পরিত্যাগ পূর্বক বাগানের ভিতর প্রবেশ করিল । সেই অঙ্গলময় বাগান অতিক্রম করিয়া ক্রমে সেই গৃহের নিকট গিয়া উপস্থিত হইল । দেখিল, সেই গৃহের কিছুদূর অন্তরে একটা পুষ্করিণীর ঘাটের উপর দুইটা লোক উপবেশন করিয়া কি কথাবার্তা কহিতেছে । কোচমান প্রসন্নকুমার বা তাঁহার সমভিব্যাহারী ব্যক্তিকে সেই স্থানে দেখিতে না পাইয়া, উহাদিগের নিকট আসিয়া উপস্থিত হইল, ও উহাদিগকে প্রসন্নকুমার ও তাঁহার সঙ্গীর কথা জিজ্ঞাসা করিল । উত্তরে উহাদিগের মধ্যে এক ব্যক্তি কহিল, প্রায় তিন চারি ঘণ্টা হইল, যখন তাহারা এই বাগানের অপর প্রান্ত দিয়া ইহার ভিতর প্রবেশ করিতে ছল, তখন তাহারা একটা বাবু ও অপর এক ব্যক্তিকে সেই দিক দিয়া এই বাগান হইতে বহির্গত হইয়া

যাইতে দেখিয়াছে । তাহারা যে কে কোথায় গিয়াছে, তাহা তাহারা বলিতে পারে না ।

উহাদিগের কথা শুনিয়া কোচমান বুদ্ধিতে পারিল, কার্য্যগতিকে তাঁহারা এই বাগান হইতে বহির্গত হইয়া গিয়াছেন, তাহাকে বলিয়া ষাইবার সময় পান নাই । মনে মনে এইরূপ ভাবিয়া সে আপন গাড়ীতে প্রত্যাগমন করিল, ও আরও দুই ঘণ্টা কাল সেই স্থানে অপেক্ষা করিয়া নিতান্ত ক্ষুধমনে সে আপন গাড়ী লইয়া সেই স্থান হইতে প্রস্থান করিল ।

## নবম পরিচ্ছেদ ।

যে সময় প্রসন্নকুমার সেই কোচমানের সহিত মালতীর অনুসন্ধান করিবার নিমিত্ত সেই বাগানের ভিতর প্রবেশ করেন, সেই সময় সেই দস্যুসর্দার গঙ্গারাম তাহার দুইজন প্রিয় অনুচর রামরচণ ও কালিচরণের সহিত সেই স্থানে উপস্থিত ছিল, কিন্তু তাহারা একরূপ স্থানে ছিল যে, প্রসন্নকুমার তাহাদিগকে সেই সময় দেখিতে পান নাই । তাহাদিগের দলের অপর দস্যু সেই কোচমান যখন প্রসন্নকুমারকে লইয়া গিয়া ঐ ঘর দেখাইয়া দেয়, ও বালিকার ক্রন্দনধ্বনি শুনিয়া যখন প্রসন্নকুমার সেই ঘরের ভিতর প্রবেশ করেন, সেই সময় উহারা দ্রুতগতি আসিয়া ঐ কোচ-

মানের সাহায্যে ঐ ঘরের দরজা বাহির হইতে বন্ধ করিয়া দেয়। ও উহাতে একটা মজবুত তাল বন্ধ করিয়া, পরিশেষে লৌহ কপাট বন্ধ করিয়া দিয়া তাহাতেও একটা তাল দেয়। এইরূপে প্রসন্নকুমারকে আবদ্ধ করিয়া সেই কোচমান বাগানের অপর প্রান্ত দিয়া বাহির হইয়া যায়। দস্যু সর্দার গঙ্গারাম তাহার অনুচর রামচরণ ও কালিচরণের সহিত সেই স্থানে অপেক্ষা করিতে থাকে।

ইতি পূর্বে দস্যুগণ একস্থানে সম্মিলিত হইয়া প্রসন্নকুমারের সর্বনাশ সাধন করিবার নিমিত্ত যে মন্ত্রণা করিতেছিল, তাহা এখন সার্থক হইল। প্রসন্নকুমারকে আবদ্ধ করিবার নিমিত্ত তাহারা যে জাল পাতিয়াছিল, প্রসন্নকুমার ঘুরিয়া ফিরিয়া আপনা হইতেই সেই জালে আসিয়া আবদ্ধ হইল। এখন দস্যুগণের মনস্কামনা পূর্ণ হইল। তাহাদিগের সম্পূর্ণ বিশ্বাস ছিল, যেরূপ অবস্থায় ও যে স্থানে তাহারা প্রসন্নকুমারকে আবদ্ধ করিতে সমর্থ হইয়াছে, সেই স্থান হইতে প্রসন্নকুমারকে অনুসন্ধান করিয়া বাহির করা কাহারও পক্ষে নিতান্ত সহজ হইবে না। আর যদি অনুসন্ধান করিয়া কেহ বাহির করিতে সমর্থ হয়, তাহা হইলেও সে সময়-সাপেক্ষ, ততদিবস অনশনে ঐ ঘরের ভিতরই প্রসন্নকুমারের জীবনলীলা শেষ হইবে।

দস্যুগণের মন্ত্রণার কল পাঠকগণ বুচকে

দর্শন করিলেন সত্য, কিন্তু উহারা যে কি মন্ত্রণা করিয়াছিল, তাহা কি আপনারা ঠিক বুঝিয়া উঠিতে পারিয়াছেন? যদি না পারিয়া থাকেন, তাহা হইলে তাহার একটু আভাস এই স্থানে প্রদান করিতেছি।

দস্যুদিগের মন্ত্রণায় পরিশেষে ইহাই সাব্যস্ত হয় যে, কোন গতিকে প্রসন্নকুমারকে ইহজগৎ হইতে অন্তর্হিত করিতে না পারিলে কিছুতেই স্মৃচাকরূপে তাহারা তাহাদিগের কার্য্য নিরূপিত করিতে পারিবে না। আরও স্থিরীকৃত হয় যে, এরূপ কোন একটা অপরাধ করা আবশ্যিক যে, সেই অপরাধের অনুসন্ধানের জন্য প্রসন্নকুমার নিয়োজিত হন এবং ঐ অনুসন্ধানের সময় যখন তিনি জানিতে পারিবেন, কোথায় গমন করিলে তিনি তাহার অনুসন্ধান কৃতকার্য্য হইতে পারিবেন, তখন সেই সময় তাঁহাকে সেই স্থানে গমন করিতেই হইবে। সেই স্থানে যদি তিনি একাকী গমন করেন, তাহা হইলে সেই স্থানেই দস্যুগণ তাহাদিগের মনোবাঞ্ছা পূর্ণ করিয়া লইবে।

দস্যুদিগের মধ্যে এইরূপ মোটা মুটি মন্ত্রণা স্থির হইলে, দলপতি এইরূপ স্থির করে যে, কোন নিভৃত স্থানে একটা নিভৃত বাড়ী স্থির করিতে হইবে। তাহাদিগের অভিলষিত বাড়ী প্রাপ্ত হইলে, তাহাদিগের মধ্যে কেহ কোনরূপ উপায় অবলম্বন করিয়া এই কলিকাতা সহরের কোন বিশেষ সম্ভ্রান্ত

ব্যক্তির একটি বালক বা বালিকাকে কোন-  
রূপে অপহরণ করিয়া সেই নিভৃত স্থানে  
লুকাইয়া রাখিবে। বড় লোকের বালক বা  
বালিকা চুরি হইলে নিশ্চয়ই ছলুছুল পড়িয়া  
যাইবে। চারি দিকে অনুসন্ধান আরম্ভ  
হইবে। পরিশেষে কোন ডিটেকটিভ  
কর্মচারী নিশ্চয়ই এই অনুসন্ধান নিযুক্ত  
হইবেন। যদি প্রসন্নকুমারের হস্তে এই  
অনুসন্ধানের ভার ন্যস্ত হয়, তবে তাহাদিগের  
মধ্যে কোন ব্যক্তি গোয়েন্দা হইয়া সেই  
অপহৃত বালক বা বালিকাকে দেখাইয়া  
দিবার নিমিত্ত প্রসন্নকুমারকে সঙ্গে লইয়া  
সেই বাড়ীতে গমন করিবে। পরে সুবিধামত  
তাঁহাকে সেই স্থানে আবদ্ধ করিয়া তাঁহার  
জীবন নষ্ট করিবে। আর যদি প্রসন্নকুমারের  
হস্তে ঐ অনুসন্ধানের ভার ন্যস্ত না হয়,  
তাহা হইলেও, ঐ বালক বা বালিকা কোন্  
স্থানে আছে, এই সংবাদ তাঁহাকে প্রদান  
করিলে বা সেই স্থান তাঁহাকে দেখাইয়া  
দিলে তিনি নিশ্চয়ই সেই স্থানে আগমন  
করিবেন, তাহার কিছুমাত্র সন্দেহ নাই।  
যদি তিনি একাকী আগমন করেন, তাহা  
হইলে ঐ বাড়ী ও বালক বালিকাকে দেখা-  
ইয়া দিবে ও সেই সাবকাশে তাহাদিগের  
মনস্কামনা পূর্ণ করিয়া লইবে। আর যদি  
একাকী না আসিয়া অপর লোক জনের  
সহিত আগমন করেন, তাহা হইলে কদাচ  
সেই বাড়ী দেখাইয়া দিবে না।

এই পরামর্শ অনুযায়ী একজন কাঁকড়-  
গাছির বাড়ী স্থির করে, দ্বিতীয় ব্যক্তি মাল-  
তিকে অপহরণ করিয়া আনে, তৃতীয় যে  
কোচমানি করিত, সেই প্রসন্নকুমারকে সঙ্গে  
করিয়া ঐ বাড়ীতে লইয়া আসে, ও সকলে  
মিলিয়া তাঁহাকে সেই বাড়ীর ভিতর আবদ্ধ  
করে।

পূর্বেই একপ্রকার স্থির হইয়াছিল যে,  
প্রসন্নকুমারকে কোনরূপে আবদ্ধ করিতে  
পারিলেই, তাহারা তখনই তাহাকে হত্যা  
করিবে। কিন্তু সৌভাগ্যক্রমে তাহারা  
যে রূপ বাড়ী প্রাপ্ত হইয়াছিল, তাহাতে  
তাহারা সঙ্গে সঙ্গে প্রসন্নকুমারকে হত্যা  
করিবার বাসনা পরিত্যাগ করিল। তাহারা  
দেখিল, যে প্রকোষ্ঠের ভিতর প্রসন্নকুমার  
আবদ্ধ হইল, তাহার ভিতর হইতে তিনি  
কোনরূপেই বহির্গত হইতে পারিবেন না।  
সুতরাং অনশনে তাঁহাকে সেই স্থানেই  
জীবনের শেষ অংশ অতিবাহিত করিতে  
হইবে।

যে গ্রামে ব্যাঘ্রের অতিশয় উৎপাত হয়,  
যে গ্রাম হইতে রাত্রিকালে গরু বাছুর,  
ছাগল, ভেড়া ও সুযোগমতে মনুষ্যগণকে  
ব্যাঘ্রে লইয়া যায়, হত্যা করে, সেই সকল  
গ্রামে সময় সময় ব্যাঘ্র মারিবার বিশেষ রূপ  
চেষ্টা হইয়া থাকে—গ্রামের লোকে ব্যাঘ্র  
মারিবার খাঁচা প্রস্তুত করিয়া থাকে। মফঃ-  
স্বলের পাঠকগণের মধ্যে সেরূপ খাঁচা অনেক



কেই দেখিয়াছেন। ঐ সকল খাঁচা প্রায় দশ ফিট, লম্বা চারি ফিট চওড়া ও পাঁচ ফিট উচ্চ হয়। উহার চারি পার্শ্বে খুব মজবুত রেলিং দেওয়া, উপর ও নিচে মজবুত তক্তা দ্বারা আবদ্ধ। ঐ খাঁচার মধ্যে এক দিকে একটা ভেড়া বা ছাগল থাকিতে পারে, এরূপ একটা বিভাগ করিয়া দেওয়া হয়। যে অংশে ছাগল বা ভেড়া রক্ষিত হইবে, তাহার চতুর্দিকের রেল সকল এরূপ ঘনভাবে বসান, যাহাতে সেই স্থানে ব্যাঘ্র আসিয়া ঐ রেলের ভিতর দিয়া তাহার হস্ত প্রবেশ করাইয়া ঐ ছাগল বা ভেড়াকে কোনরূপে হত্যা করিতে না পারে। উহার উপর যে তক্তার ছাদ থাকে, তাহাতে এরূপ একটা দরজা রাখা হয় যে, তাহার ভিতর দিয়া ঐ ছাগল বা ভেড়া উহার ভিতর অনায়াসে রাখা যাইতে পারে বা বাহির করিয়া লওয়া যাইতে পারে। ঐ খাঁচার অপর প্রান্তে একটা দরজা এরূপ ভাবে প্রস্তুত করা হয় যে, উহার ভিতর দিয়া ব্যাঘ্র অনায়াসে ঐ খাঁচার ভিতর প্রবেশ করিতে পারে। ঐ খাঁচার যে অংশ রেল দ্বারা বিভাগিত করিয়া ছাগল বা ভেড়ার থাকিবার স্থান করা হইয়াছে, ঐ রেলের গাত্রে যেদিকে বাঘ থাকিবার স্থান হইয়াছে, সেই দিকে ছেঁড়া জালের অংশ বা সেইরূপ কোন পদার্থ রাখা হয়। ব্যাঘ্র প্রবেশ করিবার দরজা উঠাইয়া, তাহাতে সংলগ্ন একগাছি

দড়ি ঐ জালের সহিত এরূপ ভাবে আটকাইয়া রাখা হইয়া থাকে যে, ঐ জাল ধরিলে বা উহাতে সামান্য রূপ হাতের জোর পড়িলেই ঐ দড়ি ঐ জাল হইতে বিচ্ছিন্ন হইয়া যায়, ও সেই সঙ্গে ব্যাঘ্র প্রবেশ করিবার দরজাও পতিত হয়।

শিকারীগণ পূর্কবর্ণিত ছাগল বা ভেড়ার ঘরের ভিতর একটা কি দুইটা ছাগল বা ভেড়া রাখিয়া উহার দরজা উপর হইতে উত্তমরূপে বন্ধ করিয়া দেয়। ব্যাঘ্র প্রবেশের দরজা উঠাইয়া দিয়া, তাহার সংলগ্ন দড়ি ঐ জালের সহিত পূর্ককথিত রূপে সংলগ্ন করিয়া ঐ খাঁচা ব্যাঘ্র আগমনের স্থানে পাতিয়া রাখে। রাত্রিকালে ব্যাঘ্র, ঐ মেঘ বা ছাগলের গন্ধ পাইয়াই হউক, বা কোনরূপে দেখিতে পাইয়াই হউক, অথবা তাহা-দিগের চীৎকার শুনিয়াই হউক, সেই স্থানে আগমন পূর্কক ঐ খাঁচার ভিতর হস্ত ঢুকাইয়া উহাকে ধরিতে চেষ্টা করে। কোনরূপে উহার ভিতর হস্ত ঢুকাইতে না পারিলে, উহার ভিতর প্রবেশ করিবার চেষ্টা দেখে ও প্রবেশের গন্ধ দেখিতে পাইলেই উহার ভিতর দিয়া যেমন প্রবেশ করিয়া থাকে ও যেমন ঐ ছাগল বা ভেড়ার দিকে গিয়া পুনরায় সেই ঘরের ভিতর হইতে ছাগল বা ভেড়াকে ধরিবার চেষ্টা করে, অমনি ঐ জালে তাহার হস্ত বা পনের আঘাত লাগিবার সঙ্গে সঙ্গে ঐ খাঁচার

কপাট পড়িয়া বার, ব্যাব্রও সেই খাঁচার আবদ্ধ হইয়া পড়ে। শিকারীগণ দূর হইতে উহা দেখিতে পাইয়া, সেই স্থানে আগমন পূর্বক যে মেষ বা ছাগলের লোভে ব্যাব্র সেই খাঁচার ভিতর আবদ্ধ হইয়াছে, তাহার নিকট আগমন করে, ও উপরের কপাট খুলিয়া সেই মেষ বা ছাগলকে সেই খাঁচা হইতে বাহির করিয়া লয়। পরিশেষে সেই আবদ্ধ ব্যাব্রকে তাহারা হত্যা করিয়া থাকে।

দস্যু সর্দার গঙ্গারাম যে ব্যাব্রকে ধৃত করিবার মানসে খাঁচা প্রস্তুত করিয়াছিল, ও যে ব্যাব্রকে প্রলোভিত করিবার মানসে মালতীকে অপহরণ করিয়া অপর প্রকোষ্ঠে আবদ্ধ করিয়াছিল আজ প্রসন্নকুমার সেই মালতীর উদ্দেশে সেই প্রকোষ্ঠরূপ খাঁচার ভিতর প্রবেশ করিয়া সেই স্থানেই আবদ্ধ হইলেন। এখন গঙ্গারাম ও তাহার অনুচরদ্বয় ভাবিল, যখন তাহাদিগের মনস্কামনা পূর্ণ হইয়াছে, তখন নিরপরাধিনী মালতীকে আর আবদ্ধ করিয়া রাখা কোন-রূপেই কর্তব্য নহে। কিন্তু তাহারা সেই সময় তাহাকে ছাড়িয়া দিতে পারিল না। কারণ যে গাড়ীতে প্রসন্নকুমার সেই স্থানে আগমন করিয়াছিলেন, সেই গাড়ী তখন সেই স্থানেই উপস্থিত ছিল, পাছে সেই গাড়োয়ান দেখিতে পায়, এই আশঙ্কায় তাহারা সেই সময় মালতীকে বাহির করিতে সাহসী

হইল না, অথচ উহাকে পরিত্যাগ করিয়াও সেই স্থান হইতে প্রস্থান করিল না। অনেক-ক্ষণ পরে সেই গাড়োয়ান চলিয়া গেল।

সন্ধ্যা হইল, সন্ধ্যার পর উহাদিগের বন্দোবস্ত অক্ষুণ্ণ, যে গাড়ীতে করিয়া ঐ বালিকাকে সেই স্থানে আনা হইয়াছিল, সেই গাড়ী আসিয়া সেই স্থানে উপস্থিত হইল। তখন গঙ্গারাম মালতীর চক্ষু উত্তম-রূপে কাপড় দিয়া বঁধিয়া সেই ঘর হইতে তাহাকে বাহির করিল ও গাড়ীতে তাহাকে স্থাপিত করিয়া যে স্থান হইতে তাহাকে অপহরণ করিয়া আনিয়াছিল, তাহার বিপরীত দিকে গমন করিয়া, একটা নির্জন স্থানে ছাড়িয়া দিল। অনন্তর গাড়োয়ান আপন স্থানে প্রস্থান করিল।

## দশম পরিচ্ছেদ

গয়ার মা একটা নিতান্ত দরিদ্র শ্রীলোক, জাতিতে কৈবর্ত। তাহার বয়ঃক্রম পঁচিশ বৎসরের অধিক হইবে না। কিন্তু দরিদ্রতা নিবন্ধন, তাহার শরীর কুশ হইয়া পড়িয়াছে, হঠাৎ দেখিলে বোধ হয়, তাহার বয়ঃক্রম ৪০ উত্তীর্ণ হইয়া গিয়াছে। গয়ার মা কৈবর্তের মেয়ে, সময়ে তাহার অবস্থা ভালই ছিল। তাহার স্বামীর দুইখানি লাসল বহিত। সে নিজে চাষ করিত, উৎপাতীত

একটা চাকর ছিল। হালের গরু ব্যতীত তাহার আরও চারি পাঁচটা গাভী ছিল। উহাদিগের সেবা শুশ্রূষা করিবার মিমিত্ত আরও একটা বালককে সে প্রতিপালন করিত। তাহার ঘরে যে পরিমাণ দুগ্ধ হইত, তাহা আপনায়্যা খাইয়া অবশিষ্ট বিক্রয় করিত। উহার ঘরে ধান চাল সর্বদাই মজুত থাকিত। গঙ্গারাম নামক তাহার একটা পুত্র ছিল। তাহার বয়ঃক্রমও প্রায় ৭৮ বৎসর হইয়াছিল। যে বাগামে আজ প্রসন্নকুমার আবদ্ধ, সেই বাগানের সন্নিকটে জমিদারের জায়গায়, গোলপাতার ঘর বাধিয়া সে বাস করিত। এইরূপে সুখ স্বচ্ছন্দে কিছু দিবস বাস করিবার পর, গয়ার নার অবস্থা একেবারে পরিবর্তন হইয়া যায়। এক বৎসরের মধ্যে তাহার স্বামী ও পুত্রটি মারা যায়। গরু বাছুরগুলিও ক্রমে তাহাদিগের অন্তর্গমন করে। চাষ আবাদ বন্ধ হইয়া যায়। ঘরে ধান চাল প্রভৃতি যাহা কিছু মজুত ছিল, তাহাও ক্রমে নিঃশেষিত হইয়া পড়ে। ক্রমে গয়ার মার অতিশয় কষ্ট হয়, আহাঙ্গাদির সংকুলান হওয়া দায় হইয়া পড়ে। জমিদারের খাজনাও ক্রমে বাকী পড়িতে আরম্ভ হয়। যে নিজের অন্ন সংস্থানে অসমর্থ, সে কোথা হইতে জমিদারের খাজনা দিবে? জমিদার তাহার উপর নালিস করিয়া ডিক্রী করেন, যথাসময়ে ঘর কয়খানি বিক্রয় হইয়া যায়।

যে ব্যক্তি উহা খরিদ করে, সে উহা ভাঙ্গিয়া লইয়া যায়। গয়ার মা কিন্তু সেই স্থান পরিত্যাগ করে না। সে নিকটবর্তী বাগান হইতে তালপাতা, মারিকেলপাতা প্রভৃতি সংগ্রহ করিয়া একটা বৃক্ষের অন্তরালে এক-খানি ক্ষুদ্র কুণ্ডের প্রস্তুত করে, ও তাহাতেই কোনরূপ দিন অতিবাহিত করে। অনেকে তাহাকে সেই স্থান পরিত্যাগ করিয়া যাইতে পরামর্শ দিয়াছিল, কিন্তু যে স্থানে তাহার স্বামী পুত্র বাস করিয়া গিয়াছে, সে সেই স্থান পরিত্যাগ করিতে চাহে না। অনেক দুঃখিত্র লোক তাহাকে স্ব স্ব ইচ্ছানুযায়ী কুপরাণর্শ দিয়া তাহার ক্লেশ নিবারণের পথ দেখাইয়া দিয়াছিল, কিন্তু সেই সকল প্রস্তাবে সম্মত হওয়া দূরে থাকুক, তাহাদিগকে গালি দিয়া সে তাহাদিগের সংশ্রব একেবারে পরিত্যাগ করে। সে মনে মনে স্থির করিয়াছিল, যদি একান্তই অনশনে তাহাকে মরিতে হয়, সেই জঙ্গলের ভিতরই মরিবে, কিন্তু সেই স্থান পরিত্যাগ করিয়া সে লোকালয়ে গমন করিবে না, বা কোন দুঃস্থ লোকের কোন পরামর্শ সে শুনিবে না। মনে মনে এইরূপ দৃঢ়প্রতিজ্ঞ হইয়া গয়ার মা সেই স্থানেই বাস করিতে লাগিল।

যে জমিদার উহার ঘর বিক্রয় করিয়া লইয়াছিলেন, তিনি পরিশেষে গয়ার মার অবস্থা শুনিয়া এক দিবস সেই স্থানে আসিয়া উপস্থিত হইলেন, স্বচক্ষে তাহাকে দেখিয়া



তাঁহার মন আর্দ্র হইল। কিয়ৎ-  
পরিমাণ জমি দেখাইয়া দিয়া কহিলেন,  
ইহাতে গাছপালা লাগাইয়া কোন গভিকে  
তুমি তোমার জীবন অতিবাহিত কর।  
যত দিবস তুমি বাঁচিবে, তত দিবস সেই  
জমির খাজনা তোমাকে দিতে হইবে না।

গয়ার মা ঐ জমিতে শাক সব্জি নিজে  
পরিশ্রম করিয়া প্রস্তুত করিত ও তাহাই  
বিক্রয় করিয়া যে দুই চারি পয়সা পাইত,  
তাঁহার দ্বারাই কোন গভিকে নিজের  
আহারীয় ও পরিধেয় বস্ত্র সংস্থান করিত।  
জমিদার তাহার নিকট হইতে ঐ জমির  
খাজনা লইতেন না সত্য, কিন্তু সময় সময়  
গয়ার মা ঐ জমিতে উৎপন্ন তরিতরকারি  
জমিদারের বাড়ীতে গিয়া দিয়া আসিত।  
যে স্থানে গয়ার মা বাস করিত, সেই স্থানে  
পুকুরিণী আদৌ ছিল না, সুতরাং গয়ার  
মার জল প্রাপ্তির বড়ই কষ্ট হইত। যে  
বাগানে প্রসন্নকুমার আবদ্ধ, সেই বাগানে  
একটা পুকুরিণী ছিল, উহা হইতে জল সংগ্রহ  
করিয়া গয়ার মা তাহার সমস্ত কাণ্ড্য নির্কাহ  
করিত ও তাহার ক্ষুদ্র তরকারির বাগানেও  
উহার জল লইয়া সেচন করিত। পুকুরিণীর  
অপর প্রান্তে অর্থাৎ বেদিকে গয়ার মা বাস  
করিত, সেই দিকে জঙ্গলের মধ্য দিয়া ঐ  
পুকুরিণীতে নামিবার একটা ক্ষুদ্র রাস্তা  
ছিল, গয়ার মার যাতায়াতের নিমিত্তই  
বোধ হয় ঐ রাস্তা আপনা হইতেই হইয়া

গিয়াছিল। গয়ার মা ঐ রাস্তা দিয়া  
পুকুরিণী হইতে জল আনিত। সেই স্থানের  
জঙ্গল নিবন্ধন অপর কোন স্থান হইতে  
কেহই তাহাকে সহজে দেখিতে পাইত না।

এক দিবস বৈকালে জল আনিবার  
নিমিত্ত গয়ার মা যখন সেই পুকুরিণীতে  
গিয়াছিল, সেই সময় ঐ বাগানের গৃহের  
সন্মুখে সে দুই তিনজন লোককে দেখিতে  
পায় ও একটা বালিকার অক্ষুট ক্রন্দন-  
ধ্বনি তাহার কর্ণে প্রবেশ করে। কিন্তু  
গয়ার মা সে সম্বন্ধে আর কোনরূপ লক্ষ্য  
করে নাই। সে মনে করে, উহারা আসিয়া  
হয় ত সেই বাগানে বাস করিতে আরম্ভ  
করিয়াছে। ইহার পর তিন দিবস যায়।  
চতুর্থ দিবস দেখিতে পায়, দুই তিন ব্যক্তি  
পুকুরিণীর ঘাটে বসিয়া কি কথাবার্তা  
কহিতেছে। সেই সময় প্রায় সন্ধ্যা হইয়া  
গিয়াছে, বাগানের ভিতর অন্ধকার আসিয়া  
আচ্ছন্ন করিয়াছে। সেই সময় গয়ার মা  
শুনিতে পায়, একজন বলিতেছে, “চল, আজ  
রাত্রিকালেই আমরা এই স্থান হইতে প্রস্থান  
করি, উহাকে যেরূপে আবদ্ধ করা হইয়াছে,  
তাহাতে আর কিছুই দেখিতে হইবে না,  
আপনা আপনিই এই ঘরের ভিতর মরিয়া  
পড়িয়া থাকিবে।”

গয়ার মা এই কয়েকটা কথা শুনিল  
সত্য কিন্তু সে উহার মর্ম্ম ভালরূপে বুঝিয়া  
উঠিতে পারিল না, সুতরাং সেদিকে আর

লক্ষ্যও করিল না। পুষ্করিণী হইতে জল লইয়া সে ধীরে ধীরে আপন কুটিরাভিমুখে প্রস্থান করিল।

সে যাহা শুনিয়াছিল, সে সম্বন্ধে সে আর কোন কথা ভাবিল না, বা কোন কথা আর তাহার মনেও হইল না।

পরদিবস দিবা দ্বিপ্রহরের সময় যখন গয়ার মা ঐ পুষ্করিণীতে স্নান করিতে গমন করে, সেই সময় সে ঐ বাগানের ভিতর কাহাকেও দেখিতে পায় নাই। কিন্তু পূর্ব দিবস সন্ধ্যার সময় সে যাহা শুনিয়াছিল, তাহাও তাহার কিছুই মনে নাই। সেই দিবস সন্ধ্যার পূর্বে পুনরায় সে যখন জল লইতে আইসে, সেই সময়ও কোন ব্যক্তি তাহার নয়নগোচর হয় নাই। কিন্তু হঠাৎ তাহার মনে হয়, কয়েকদিবস পূর্বে সে ঐ বাগানের ঘর হইতে বালিকার কণ্ঠস্বর শুনিতে পাইয়াছিল, স্মৃতরাং নিশ্চয়ই কোন ব্যক্তি পরিবার লইয়া সেই বাগানে আসিয়া বাস করিতেছে। মনে মনে এইরূপ ভাবিয়া, তাহার কলসী সেই পুষ্করিণীর ধারে রাখিয়া সে ধীরে ধীরে ঐ গৃহের সন্নিকটে আগমন করে, কিন্তু স্ত্রী কি পুরুষ কোন লোককে দেখিতে না পাইয়া সে সেই বাড়ীর ভিতর প্রবেশ করে, দেখিতে পায়, সমস্ত ঘরই শূন্য অবস্থায় রহিয়াছে, কেবল একটা ঘরের কাষ্ঠ ও লৌহ নির্মিত উভয় দরজা বাহির হইতে তালাবদ্ধ।

এই ঘরের এইরূপ অবস্থা দেখিয়া পূর্বে সে যাহা শুনিয়াছিল, তাহা হঠাৎ তাহার মনে হইল। তখন সে ভাবিল, যাহারা এই বাগানে ছিল, তাহাদিগের মধ্যে কেহ বলিয়াছিল, উহাকে যেরূপে আবদ্ধ করা হইয়াছে, তাহাতে সে আপনিই এই ঘরের ভিতর মরিয়া থাকিবে। সে মনে মনে ভাবিল, তবে কি এই ঘরের ভিতর কাহাকেও আবদ্ধ করিয়া রাখা হইয়াছে? যদি তাহাই হয়, তাহা হইলে কিরূপে সেই মনুষ্যকে উদ্ধার করা যাইতে পারে। মনে মনে এইরূপ ভাবিয়া সেই ঘরে প্রবেশ করিবার আর কোন উপায় আছে কি না, তাহা গয়ার মা দেখিল ও বুঝিল, ঐ দরজা ভিন্ন উহার ভিতর প্রবেশ করিবার আর কোনরূপ উপায় নাই। তখন সে ঐ তালা ভাঙ্গিবার চেষ্টা করিল, কিন্তু সেই দুর্বল স্ত্রীলোকের সামর্থ্য উহা কুলাইল না। অগত্যা দুঃখিত মনে, কি ভাবিতে ভাবিতে— আপন কুটির অভিমুখে প্রস্থান করিল।

## একাদশ পরিচ্ছেদ ।

পাঠকগণ ইহার পূর্বে অবগত হইয়াছেন যে, দস্যুগণ প্রসন্নকুমারকে আবদ্ধ করিয়া মালতীকে ঐ স্থান হইতে বাহির করতঃ

একটি অপরিচিত স্থানে পরিত্যাগ পূর্বক, আপন আপন স্থানে প্রস্থান করে। মালতী সেই অবস্থায় কিছুক্ষণ পড়িয়া থাকিয়া আপন চক্ষুর বন্ধন কোনরূপে খুলিয়া ফেলে। তখন সে দেখিতে পায়, একটি অপরিচিত স্থানে অন্ধকারের ভিতর সে পড়িয়াছে। এই কয়েক দিবস অনশনে ও অর্কশনে ও দিনরাত্র কেবল রোদন করিয়া সে অতিশয় দুর্বল ও ক্লান্ত হইয়া পড়িয়াছে। তাহার চলৎশক্তি একেবারে হারিত, ক্রন্দনশক্তি নাই বলিলেও হয়। তথাপি সেই সপ্তমবর্ষীয়া বালিকা নিতান্ত গীত হইয়া ক্রন্দন করিতে লাগিল। এই-রূপ অবস্থায় অধিকক্ষণ যদি তাহাকে সেই স্থানে থাকিতে হইত, তাহা হইলে তাহার মদুষ্ঠে যে কি ঘটত, তাহা বলা যায় না।

সেই সময় একটি যুবক সেই স্থান দিয়া গমন করিতেছিল, ঐ বালিকার ক্রন্দন শব্দে তাহার দৃষ্টি সেই দিকে আকর্ষিত হইল। তিনি বুকিতে পারিলেন, পথভ্রান্ত হইয়া সেই বালিকাটী সেই স্থানে আসিয়া উপস্থিত হইয়াছে। তিনি উহাকে অনেক কথা জিজ্ঞাসা করিলেন, কিন্তু মালতী কোন কথা উত্তর প্রদান করিতে পারিল না, কেবল কাঁদিতে লাগিল। মালতীকে দেখিয়া তিনি বুকিতে পারিলেন, সে কোন মন্দ গৃহের কণ্ঠা। তিনি উহাকে আর কোন কথা জিজ্ঞাসা না করিয়া কহিলেন,

আমার সঙ্গে আইস, আমি তোমাকে তোমার বাড়ীতে পৌঁছাইয়া দিব।

যুবকের কথা শুনিয়া মালতী চূপ করিল ও তাঁহার সহিত যাইতে চেষ্টা করিল, কিন্তু তাহার আর চলিবার ক্ষমতা ছিল না, দুই এক পদ অগ্রসর হইতে না হইতেই সে সেই স্থানে পড়িয়া গেল। যুবক বুঝিলেন, উহার চলিবার ক্ষমতা নাই। তখন তিনি উহাকে আপন ক্রোড়ে লইয়া নিজ গৃহ অভিমুখে প্রস্থান করিলেন। ঐ স্থান হইতে তাঁহার গৃহ অধিক দূরে ছিল না।

ঐ যুবক ব্রাহ্মণ, কোন অফিসে কর্ম করেন, অফিস হইতে বাড়ী যাইতে প্রায়ই তাঁহার রাত্রি হয়। বাড়ীতে তাঁহার মাতা ও স্ত্রী ভিন্ন আর কেহই নাই। মালতীকে লইয়া গিয়া, তিনি তাঁহাদিগের সম্মুখে রাখিয়া দিলেন। যেরূপ অবস্থায় ও যে স্থানে তাহাকে প্রাপ্ত হইয়াছিলেন, তাহা তাবৎ তাঁহাদিগকে কহিলেন। মালতী উহাদিগকে দেখিয়া আরও ক্রন্দন করিতে লাগিল। তাঁহারা মালতীর অবস্থা দেখিয়া বেশ বুকিতে পারিলেন, যে, সে অতিশয় ক্ষুধিতা হইয়া নিতান্ত ক্লান্ত হইয়া পড়িয়াছে। তাঁহাদিগের ঘরে দুগ্ধ ছিল, সেই দুগ্ধ গরম করিয়া তখনই উহাকে একটু খাওয়াইয়া দিলেন। সে যেন একটু সুস্থ হইল। তখন তাহার নিকট হইতে উঁহারা ক্রমে ক্রমে যাহা অবগত হইতে পারিলেন, তাহাতে

এই বুঝিলেন যে, কোন ব্যক্তি তাহাকে ধরিয়ে লইয়া গিয়া, একটা ঘরের ভিতর আবদ্ধ করিয়া রাখিয়াছিল, আজ তাহাকে ছাড়িয়া দিয়াছে। সে কাহার কণ্ঠা ও কোথায় তাহার পিতা মাতা বাস করিয়া থাকেন, তাহা সে কিছুই বলিতে পারিল না। কেবল এই মাত্র বলিল যে, তাহার ঠাকুর দাদার নাম কিশোরী বাবু। ইহা ব্যতীত সে তাহার বিশেষ পরিচয় আর কিছুই প্রদান করিতে পারিল না।

সেই রাতে উহার পিতা মাতার সন্ধান হওয়া নিতান্ত সুকঠিন, এই ভাবিয়া তাঁহারা মালতীকে অনেক বুঝাইয়া বিশেষ যত্নের সহিত আপনানিগের বাড়ীতেই রাখিয়া দিলেন ও রাতে তাহাকে চারিটা অন্নও আহার করাইলেন।

পর দিবস প্রাতঃকালে সেই যুবক মালতীকে একখানি গাড়ীতে করিয়া লইয়া নিকটবর্তী থানায় গিয়া উপস্থিত হইলেন, কি অবস্থায় ও কোথায় মালতীকে প্রাপ্ত হইয়াছিলেন, তাহার সমস্ত অর্থাৎ সেই থানার কর্মচারীকে কাহলেন ও মালতীর নিকট হইতে যাহা কিছু অবগত হইতে পারা গিয়াছিল, তাহাও তাঁহাকে বলিলেন। কর্মচারী মহাশয় সমস্ত অবস্থা শুনিয়া, একটু চিন্তা করিলেন, পরিশেষে কাহিলেন, এই বালিকা নিরুদ্দেশ হওয়ার পর একটা বজ্রাপন ছাপা হইয়া প্রত্যেক থানায় বিলি

করা হইয়াছে ও প্রত্যেক থানাতেই ইহার অনুসন্ধান করা হইতেছে। এই বলিয়া তিনি আর একজন কর্মচারীকে ঐ বিজ্ঞাপনের কাগজখানি আনিতে কাহিলেন। তিনি উহা আনিয়া সেই স্থানে উপস্থিত করিলেন। তখন উহা দেখিয়া সেই যুবক জানিতে পারিলেন, যে মালতী কাহার কণ্ঠা ও কোথায় তাহার পিতা মাতা বাস করিয়া থাকেন, ও কিরূপ অবস্থায় কোন্ দিবস হইতে মালতী অপহৃত হইয়াছে।

এ সময়ে এখন যাহা কিছু থানায় লেখা পড়া করিবার প্রয়োজন, তাহা লিখিয়া লইয়া কর্মচারী ঐ যুবকের সহিত একজন প্রহরীকে পাঠাইয়া দিলেন। যুবক ঐ প্রহরী ও মালতীকে লইয়া তাঁহার সেই গাড়ীতে আসিয়া উপবেশন করিলেন ও রায় বাহাদুর কিশোরীলাল বর্মণের বাসস্থান উদ্দেশে গাড়ী হাঁকাইতে কাহিলেন

যে স্থানে মালতীকে পাওয়া গিয়াছিল, সেই স্থান হইতে কিশোরীলালের বাড়ী অনেক দূর ব্যবধান ছিল। তাঁহারা ক্রমে রায় বাহাদুরের বাড়ীতে উপনীত হইলেন গাড়ী দরজায় উপস্থিত হইবা মাত্র, দারবান মালতীকে দেখিতে পাইয়া বাড়ীতে সংবাদ প্রদান করিল। মালতীর আগমন সংবাদ শুনিয়া বাড়ীর ভিতর ছলমূল পড়িয়া গেল। সদর বাড়ীতে সেই সময় যাহারা উপস্থিত ছিলেন, সকলেই দৌড়িয়া আসিয়া দরজায়

উপস্থিত হইলেন, অন্তর হইতেও প্রবীণা স্ত্রীলোকগণ বাহিরে আসিয়া উপস্থিত হইলেন। যে সকল স্ত্রীলোকের বাহিরে আসিবার উপায় নাই, তাঁহারা গৃহের নানা স্থান হইতে উঁকি ঝুঁকি মারিতে আরম্ভ করিলেন। রায় বাহাদুরের স্ত্রী প্রবীণা ছিলেন, তিনি সেই যুবক বা অপরাধী কাহাকেও দেখিয়া কোনরূপ লজ্জা না করিয়া সেই স্থানে আগমন করিলেন, ও মালতীকে গাড়ী হইতে ক্রোড়ে উঠাইয়া লইয়া, সকলকে কহিলেন, ইহার মা আগে ইহাকে দেখুক, তাহার পর আর সকলে ইহাকে দেখিও, বলিয়া দ্রুতপদে অন্তরে প্রবেশ করিলেন। সেই সময় মালতীর মুখ দিয়া কোন কথা বাহির হইল না, কেবল তাহার চক্ষু দিয়া অশ্রুধারা বহিতে লাগিল।

রায় বাহাদুর সেই সময় সেই স্থানে উপস্থিত ছিলেন, তিনি সে যুবককে ও সেই প্রহরীকে বিশেষ যত্নের সহিত নিজের বৈঠকখানায় লইয়া গিয়া বসাইলেন, ও কিরূপে, কোথায় মালতীকে পাওয়া গেল, তাহা তাঁহাদিগকে জিজ্ঞাসা করিলেন। প্রহরী কিছুই বলিতে পারিল না, যুবক যেরূপ উপায়ে মালতীকে প্রাপ্ত হইয়াছিলেন, যেরূপে তাহাকে সেই স্থান হইতে আনয়ন করেন, তাঁহার বাড়ীর স্ত্রীলোকগণ যেরূপে তাহাকে সাম্বনা করিয়া তাঁহাদিগের নিকট রাত্রে রাখিয়াছিলেন, ও পরদিবস তাহাকে

ধানায় আনিয়া যেরূপে তাহার পিতা-মহের সন্ধান পান, তাহা সমস্ত আনুপূর্বিক বর্ণন করিলেন। রায় বাহাদুর তাঁহার কথা শুনিয়া অতিশয় বিস্মিত ও সন্তুষ্ট হইলেন, তিনি সেই যুবককে কিছু পারিতোষিক প্রদান করিতে ইচ্ছা করিলেন, কিন্তু যুবক তাহা গ্রহণে সন্মত হইলেন না, তখন তিনি সেই প্রহরীকে কিছু পারিতোষিক প্রদান করিয়া ও গাড়োয়ানকে সেই স্থানে আসিবার ও সেই যুবককে সেই স্থান হইতে পুনরায় তাঁহার বাড়ীতে পৌঁছিয়া দিবার ভাড়া ও পারিতোষিক স্বরূপে আরও কিছু প্রদান করিয়া তাঁহাদিগকে বিদায় করিলেন। যুবক সেই স্থান হইতে প্রস্থান করিবার সময় রায় বাহাদুর তাঁহার নাম ও ঠিকানা লিখিয়া লইলেন ও তাঁহাকে কহিলেন, দুই এক দিবসের মধ্যে তিনি তাঁহার বাড়ীতে গিয়া তাঁহার সহিত সাক্ষাৎ করিবেন।

রায় বাহাদুর যাহা বলিয়াছিলেন, কার্যেও তাহাই করিলেন। দুই তিন দিবস পরে রায় বাহাদুর সন্ধ্যার পর তাঁহার স্ত্রী মালতীকে সঙ্গে লইয়া সেই যুবকের বাড়ীতে গিয়া উপস্থিত হইলেন। সেই সময় ঐ যুবক অফিস হইতে প্রত্যাগমন করেন নাই, সুতরাং রায় বাহাদুর আর তাঁহার গাড়ী হইতে অবতরণ করিলেন না, তিনি বাহির হইতে সেই যুবককে ডাকায় কাহার

কোনরূপ উত্তর পাইলেন না কিন্তু দেখিতে পাইলেন, ঐ বাড়ীর দরজার অন্তরাল হইতে একটা স্ত্রীলোক তাঁহাদিগকে দেখিতেছেন, কিন্তু কোনরূপ উত্তর প্রদান করিতে পারিতেছেন না। ইহা দেখিয়া রায় বাগদুর মালতীকে সঙ্গে লইয়া সেই গাড়ী হইতে অবতরণ করিলেন ও সেই বাড়ীর ভিতর প্রবেশ করিলেন।

তিনি ঐ বাড়ীতে প্রবেশ করিবামাত্র একটা স্ত্রীলোক আসিয়া মালতীকে ক্রোড়ে তুলিয়া লইলেন। তিনি দেখিতে পাইলেন, ঐ বাড়ীতে কেবল দুইটা মাত্র স্ত্রীলোক ভিন্ন আর কেহই নাই, উহাদিগকে দেখিয়াই তিনি বুকিতে পারিলেন, উহাদিগের একজন সেই যুবকের মাতা ও অপর তাঁহার স্ত্রী মালতীকে তাঁহারা সেই রাত্রি ষেকরূপ যত্ন করিয়া আপন গৃহে স্থান প্রদান করিয়াছিলেন, তাহার নিমিত্ত তিনি উহাদিগকে বিশেষরূপে ধন্যবাদ প্রদান করিয়া, পরিশেষে প্রণামী স্বরূপে তাঁহাদিগকে একশত টাকা প্রদান করিয়া সেই স্থান হইতে প্রস্থান করিলেন। তাঁহারা কোনরূপেই টাকা গ্রহণ করিতে চাহিলেন না কিন্তু প্রণামীর টাকা গ্রহণ না করিলে রায় বাগদুরকে বিশেষরূপে অপমানিত করা হইবে, এইরূপ বলিয়া তাঁহাদিগকে বুঝাইয়া ঐ টাকা প্রদান করিয়া চলিয়া আসিলেন।

## দ্বাদশ পরিচ্ছেদ ।

গয়ার মা একটু সামান্য ক্ষেতে গাছ পালা লাগাইয়া তাহারই উপসহ হইতে আপন জীবনধারণ করিত, ইহা পাঠকগণ অবগত আছেন। জমি খননাদি করিতে হইলে, যে দুই চারিখানি লৌহ নির্মিত যন্ত্রের প্রয়োজন, তাহাও গয়ার মার ছিল। ঐ বাগান বাড়ী হইতে বহির্গত হইয়া গয়ার মা, আপন কুঁড়ের মধ্যে গমন করিল ও সেই স্থান হইতে একখানি দা ও একটা রহং সাবল লইয়া সে পুনরায় ঐ স্থানে আগমন করিল। উহাদিগের সাহায্যে সে লৌহ নির্মিত দরজার তালাটা অনেক কষ্টে ভাঙ্গিয়া ফেলিল, পরিশেষে কাষ্ঠ নির্মিত দরজার তালাও ক্রমে ভাঙ্গিয়া সে উভয় দরজা খুলিয়া ফেলিল।

দরজা খোলা হইলে গয়ার মা দেখিল, উহার মধ্যে একটা লোক মৃতবৎ পড়িয়া রহিয়াছে। মরিয়া গিয়াছে ভাবিয়া, প্রথমতঃ ঐ ঘরের ভিতর একাকী প্রবেশ করিতে তাহার সাহসে কুলাইল না, সে কিছুক্ষণ স্থির ভাবে দরজার বাহিরে দাঁড়াইয়া উহাকে দেখিতে লাগিল। কিছুক্ষণ এইরূপে দেখিবার পর সে বুকিতে পারিল যে, ঐ ব্যক্তি মরে নাই, তাহার হাত পা নড়িতেছে। তখন সে সাহসে ভর করিয়া ধীরে ধীরে উহার নিকট



গমন করিল। ঐ ব্যক্তি গয়ার মাকে দেখিয়া, তাহার দিকে সজ্জনয়নে চাহিতে লাগিল, কিন্তু তাহার মুখ দিয়া কোন কথা বাহির হইল না, উহার মুখের ভাব দেখিয়া গয়ার মা বৃষ্টিতে পারিল, তিনি জলপান করিতে চাহিতেছেন। গয়ার মা দ্রুতপদে তাহার গৃহ হইতে একঘটি জল আনিয়া মুখে ও চক্ষে সেচন করিল ও কিয়ৎপরিমাণ উহাকে পান করাইল। জল পান করিয়া তিনি একটু সুস্থ হইলেন, ও তাঁহার মুখ দিয়া ধীরে ধীরে কথা বাহির হইল। তিনি অতি ক্ষীণস্বরে কহিলেন, মা, তুমি আমাকে রক্ষা কর। আমাকে এই স্থান হইতে বাহিরে লইয়া চল। আমার জীবন প্রায় শেষ হইয়া আসিয়াছে।

তাঁহার কথা শুনিয়া গয়ার মা কহিল, তোমার কোন ভয় নাই, আমি এখনই তোমাকে আমার কুঁড়ে ঘরে লইয়া যাই-তেছি। তুমি কোনরূপে আমার অঙ্গে ভর দিয়া আমার সহিত আগমন কর। এই বলিয়া গয়ার মা তাঁহাকে ধরিল, ধরিয়া উঠাইয়া বসাইল, ক্রমে জোর করিয়া তাঁহাকে তুলিয়া দাঁড় করাইল, ও নিজের বাহু বেঁটন করিয়া তাঁহাকে ধরিয়া তাঁহার মস্তক তাহার বাম স্বন্ধের উপর স্থাপিত করিয়া ধীরে ধীরে কোনরূপে সেই ঘর হইতে বাহির হইল।

প্রসন্নকুমারের অঙ্গে কিছুমাত্র সামর্থ্য

ছিল না, তথাপি তাঁহার যতদূর সাধ্য তাঁহার পায়ে ভর দিয়া ও শরীরের ভার গয়ার মার শরীরের উপর রাখিয়া কোনরূপে গয়ার মার সহিত গমন করিতে লাগিলেন। এইরূপে ক্রমে গয়ার মা তাঁহাকে আপন কুটারে লইয়া গেল। সে স্থান হইতে তাহার কুটারে গমন করিতে হইলে দুই মিনিটের অধিক লাগে না, কিন্তু প্রসন্নকুমারকে লইয়া যাইতে তাহার পায় অর্ধ ঘণ্টা সময় অতি-বাহিত হইয়া গেল।

গয়ার মার যে একটু সামান্য বিছানা ছিল, সে তাঁহাকে লইয়া গিয়া তাহার উপর শয়ন করাইল, ও আর একটু জল তাঁহাকে পান করাইয়া সে তাহার কুঁড়ে হইতে বাহির হইয়া গেল। কিয়ৎক্ষণ পরে কিছু দুগ্ধ আনিয়া উহা গরম করিয়া তাঁহাকে প্রদান করিল। প্রসন্নকুমার দুগ্ধ পান করিয়া বেশ সুস্থ হইলেন, তাঁহার শরীরে একটু বলের সঞ্চার হইল। তিনি তখন গয়ার মার নিকট আপনার পরিচয় প্রদান করিলেন। তাঁহার পিরানের পকেটে কিছু অর্থ ছিল, তাহা লইয়া গয়ার মাকে দিলেন, কহিলেন, এই অর্থ দ্বারা কিছু খাচু কিনিয়া আন, এবং আমার বাড়ীতে কোন-রূপে সংবাদ প্রদান কর। গয়ার মা ঐ অর্থ দ্বারা কিছু আহারীয় সংগ্রহ করিয়া আনিয়া তাঁহাকে খাওয়াইল।

গয়ার মা তাঁহার জমিদারের বাড়ীতে

প্রায় সদাসর্বদা যাইত। সুতরাং মনে করিল, তাহার জমিদারের নিকট গমন করিয়া এই সমস্ত কথা বলিয়া তাঁহার দ্বারাই যেক্রমে হয় একটা বন্দোবস্ত করা কর্তব্য। মনে মনে এইরূপ ভাবিয়া, সে প্রসন্নকুমারকে তাহার মনের ভাব বলিয়া সে সেই স্থান হইতে প্রশ্ন করিল। যাইবার সময় প্রসন্নকুমার তাঁহাকে গাড়ী করিয়া যাইতে উপদেশ দিলেন ও কহিলেন, যত শীঘ্র হয় এই কার্য সম্পন্ন কর।

প্রসন্নকুমারের কথা শুনিয়া গয়ার মা তৎক্ষণাৎ আপন জমিদারের বাড়ীতে গমন করিল, যাইতে যাইতে যে স্থানে গাড়ী পাইল, সেই স্থান হইতে উহা ভাড়া করিয়া লইল। জমিদারের সহিত সাক্ষাৎ করিয়া প্রসন্নকুমারের সমস্ত অবস্থা তাঁহাকে কহিল। তিনি প্রসন্নকুমারকে জানিতেন, কিন্তু তাঁহার বাড়ী চিনিতেন না। গয়ার মার কথা শুনিয়া তিনি অতিশয় চম্বিত হইলেন। তিনি তাঁহার বাড়ীর সন্ধান করিয়া তাঁহার বাড়ীতে এই সংবাদ প্রদান করিবার নিমিত্ত নিজেই প্রস্তুত হইলেন। যে গাড়ীতে গয়ার মা আসিয়াছিল, সেই গাড়ীতে গয়ার মার সহিত আরোহণ করিয়া তিনি সেই স্থানের পানায় গমন করিলেন। সেই স্থান হইতে প্রসন্নকুমারের বাড়ীতে গিয়া উপস্থিত হইলেন।

প্রসন্নকুমারের বাড়ীতে বেদনামাত্র জমিদার মহাশয়ও সঙ্গে চলিতেন।

তাঁহার স্ত্রী ও একটা পুত্র ছিল। প্রায় এক সপ্তাহ অতীত হইল, প্রসন্নকুমার বাড়ী হইতে বহির্গত হইয়া গিয়াছেন, তাহার পর তাঁহারা প্রসন্নকুমারের আর কোন সংবাদ পান নাই। না বলিয়া কহিয়া প্রসন্নকুমার এত দিবস কোন স্থানে থাকিতেন না। সুতরাং প্রসন্নকুমারের কোনরূপ সংবাদ না পাইয়া তাঁহার স্ত্রী পুত্র নিতান্ত অস্থির হইয়া পড়িয়াছিলেন। তাঁহার পুত্র তাঁহার প্রধান কর্মচারীর সহিত সাক্ষাৎ করিয়া পিতার সংবাদ জিজ্ঞাসাও করিয়াছিলেন, ও তাঁহার নিকট হইতে অবগত হইতে পারিয়াছিলেন যে, তিনিও প্রসন্নকুমারের কোনরূপ সংবাদ বা তাঁহার কোন পত্রাদি পান নাই। সুতরাং প্রসন্নকুমারের সংবাদের জ্ঞান তাঁহারা নিতান্ত অধৈর্য হইয়া পড়িয়াছিলেন, কারণ তাঁহারা জানিতেন যে, প্রসন্নকুমারের অনেক শত্রু। কোনরূপে প্রসন্নকুমারের সংবাদ না পাইয়া তাঁহারা নিতান্ত অধৈর্য হইয়া পড়িয়াছেন, একরূপ সময় সেই জমিদার গয়ার মার সহিত সেই স্থানে গিয়া উপস্থিত হইলেন। তাঁহারা উহাদিগের নিকট হইতে সমস্ত কথা শুনিয়া আর কালবিলম্ব না করিয়া একখানি গাড়ী আনিয়া উহাদিগের সহিত প্রসন্নকুমারের উদ্দেশে চলিলেন। বলা বাহুল্য, একরূপ অবস্থায় প্রসন্নকুমারের স্ত্রী তাঁহাদিগের সহিত গমন করিতে লজ্জিত হইলেন না।



তাঁহারা গয়ার মার সেই ক্ষুদ্র কুটীরে গমন করিয়া প্রসন্নকুমারকে যেরূপ অবস্থায় দেখিতে পাইলেন, তাহাতে কোনরূপে আর চক্ষু-জল সংবরণ করিতে পারিলেন না। পরিশেষে তাঁহাকে লইয়া আপন গৃহে আনয়ন করিলেন। গয়ারমাকেও সঙ্গে করিয়া লইয়া আসিলেন। জমিদার মহাশয় তাঁহাদিগকে বাড়ীতে পৌঁছিয়া দিয়া আপন বাসীতে প্রস্থান করিলেন।

বাড়ীতে আসিয়াই প্রসন্নকুমারের পুত্র একজন ডাক্তারকে আনাইলেন, তিনি প্রসন্নকুমারের নিকট সমস্ত অবস্থা শুনিয়া কহিলেন, আহারীয়, পানীয় ও নিশ্চল বায়ু সেবনের অভাবে প্রসন্নকুমারের এইরূপ অবস্থা ঘটয়াছে। এইরূপ অবস্থায় আর দুই চারি দিবস অতিবাহিত হইলে, প্রসন্নকুমারকে আর জীবিত অবস্থায় দেখিতে পাওয়া বাইত না।

প্রসন্নকুমার কয় দিবস যে ঐ ঘরের ভিতর আবদ্ধ ছিলেন, তাহা তিনি জানিতেন না। হিসাব করিয়া পরিশেষে জানিতে পারা গেল যে, প্রায় ৭ দিবস তিনি ঐরূপ অবস্থায় বিনা আহারে ও বিনা জল পানে অতিবাহিত করিয়াছেন।

ঔষধ ও আহারীয়ের বন্দোবস্ত করিয়া দিয়া ডাক্তার মহাশয় প্রস্থান করিলেন। ক্রমে প্রসন্নকুমার সুস্থ হইয়া উঠিলেন।

প্রসন্নকুমারের এই সংবাদ ক্রমে চারি-

দিকে রাষ্ট্র হইয়া পড়িল। তাঁহার প্রধান কর্মচারী ইহা জানিতে পারিয়া নিজে আসিয়া প্রসন্নকুমারের সহিত সাক্ষাৎ করিলেন। তাঁহার নিকট সমস্ত অবস্থা অবগত হইয়া কয়েকজন উপযুক্ত পুলিশ কর্মচারীকে ইহার অহুস্কানে নিযুক্ত করিলেন। যে কয়জন পুলিশ কর্মচারী এই অহুস্কানে নিযুক্ত হইয়াছিলেন, তাঁহারা মনে করিলেন, যাহাদিগের দ্বারা প্রসন্নকুমারের এইরূপ অবস্থা ঘটয়াছিল যাহারা প্রসন্নকুমারকে হত্যা করিবার সঙ্কল্প করিয়া প্রায় তাঁহার জীবন একরূপ শেষ করিয়া আনিয়াছিল, অহুস্কান করিয়া যদি তাহাদিগকে ধৃত করিতে ও উপযুক্তরূপ দণ্ডে দণ্ডিত করিতে সমর্থ না হই, তাহা হইলে তাঁহাদিগের অবস্থাও যে ক্রমে ঐরূপ না হইবে তাহা কে বলিতে পারে ?

মনে মনে এইরূপ ভাবিয়া তাঁহারা এই অহুস্কানে নিযুক্ত হইলেন। প্রসন্নকুমারের নিকট সমস্ত অবস্থা অবগত হইয়া, সর্বপ্রথম যে গাড়ীতে করিয়া মাসতীকে লইয়া গিয়াছিল, সেই গাড়ীর কোচমানকে অর্থাৎ যে কোচমান প্রসন্নকুমারকে সঙ্গে করিয়া যেখানে তিনি আবদ্ধ হইয়াছিলেন, সেইখানে লইয়া গিয়াছিল, সেই কোচমানকে তাঁহারা সর্বপ্রথমে ধৃত করিলেন। ঐ কোচমান একেবারে সমস্ত কথা অস্বীকার করিল। সকলেই বুঝিল, কোচমানও ঐ দস্যুদলভুক্ত।

যে গাড়ী ভাড়া করিয়া প্রসন্নকুমার ঐ বাগানে গমন করিয়াছিলেন, সেই গাড়ীর কোচম্যানকেও পাওয়া গেল। সে ও প্রসন্নকুমার উভয়েই প্রথমোক্ত গাড়ীর কোচম্যানকে দেখিয়া অগ্রেই চিনিতে পারিলেন, তথাপিও সে এখন কোন কথা স্বীকার করিল না।

মালতীকে লইয়া গিয়া ঐ বাগান দেখান হইল। সে ঐ বাগান দেখিয়া অগ্রেই চিনিতে পারিল ও যে ঘরে তাহাকে আবদ্ধ করিয়া রাখা হইয়াছিল, তাহা সে দেখাইয়া দিল।

পূর্নকথিত কোচম্যান সমস্ত কথা স্বীকার করিলেও অনুসন্ধানকারী পুলিশ কর্মচারীগণ সমস্ত কথা ক্রমে জানিতে পারিলেন। গঙ্গারাম রামচরণ ও কালীচরণ ক্রমে ধৃত হইল।

যে মালীর নিকট হইতে উহারা ঐ বাগান ভাড়া লইয়াছিল, সেই মালি উহাদিগকে দেখিবা মাত্র চিনিতে পারিল ও বেক্রম অবস্থায় উহারা ঐ বাগান ভাড়া লইয়া ছিল, তাহার সমস্তই সে বলিল।

মালতী কালীচরণকে দেখিবা মাত্রই কহিল, এই ব্যক্তি সকলকে কুল বিতরণ করিয়াছিল, ও আমাকে তাহার গাড়ীতে করিয়া লইয়া যায়। গঙ্গারামকে দেখিয়া কহিল, এই ব্যক্তিই তাহাকে ঘরের ভিতর

আবদ্ধ করে। রামচরণকে দেখিয়া কহিল, আমাকে সময় সময় সেই ঘরের মধ্যে আহারীয় দিয়া আসিত।

গয়ার মা উহাদিগের চারিজনকই দেখিয়া চিনিতে পারিল, ও কহিল, উপর্যুপরি ৩.৪ দিবস সে উহাদিগকে ঐ বাগানের ভিতর দেখিয়াছে।

অনুসন্धानে উহাদিগের উপর ক্রমে আরও অনেক সাক্ষ্য পাওয়া গেল। মেছুয়া বাজারে যে প্রথম এই ঘটনার ষড়যন্ত্র হয়, তাহারও প্রমাণ পাওয়া গেল। কুল বিতরণের ও সেই স্থানে গাড়ী রাখার আরও প্রমাণ সংগৃহীত হইল।

পুলিসের অনুসন্ধান শেষ হইলে উহারা বিচারার্থ প্রেরিত হইল। উচ্চ আদালতে উহাদিগের বিচার হইল। জজ সাহেব ও জুরিগণ এই মর্দমা সম্পূর্ণরূপে বিশ্বাস করিলেন। আসামীগণের সকলেই দোষী সাব্যস্ত হওয়ায়, জজ সাহেব তাহাদিগের সকলকেই দীর্ঘকালের জন্ম নিরাসিত করিলেন।

পুলিসের সর্কপ্রধান কর্মচারী, প্রসন্নকুমারের জীবন রক্ষা করিয়াছেন বলিয়া গয়ারমাকে সহস্র মুদ্রা পারিতোষিক প্রদান করিলেন ও সেই দিবস হইতে প্রসন্নকুমার গয়ারমাকে আপন গৃহে স্থান প্রদান করিয়া তাহাকে মাতৃবৎ সেবা করিতে লাগিলেন।

লোক-সেপান দোকান, পুণিসের চক্ষে খুলি দিবার নিমিত্তই ঐ দোকানের আবশ্যক হইয়া ছিল। দোকানের ভার যাহার উপর ন্যস্ত ছিল, সে পাঠকের পরিচিত। মিস চুরি মকদ্দমার সে গোলামহোসেন ধৃত হইয়াছে, এ সেট ব্যক্তি।

উহার দিবাভাগে দোকানে বাসিয়া লোক দেখান দোকানের কার্য সম্পন্ন করিত। কিন্তু রাত্রিকালে স্মরণে মতে চুরি করাষ্ট উর্গাদিগের প্রধান কার্য ছিল। উর্গারা বহু দিন লক্ষ্মী সহরে বাস করিয়াছিল, তত দিন চুরি ভিন্ন উর্গাদিগের অপর কোন উপার্জনের উপায় ছিল না। এইরূপে দুই তিন বৎসর লক্ষ্মী সহরে থাকিয়া উর্গারা অনেক চুরি করে, কিন্তু তাহার একটীতেও উর্গারা ধৃত হয় নাই। এইরূপ অসংউপায়ে উপার্জিত অর্থ অসং কার্যেই ব্যয় হইয়া থাকে। ঐ অর্থ হইতে মধ্যে মধ্যে হোসেনআলি কিছু কিছু আপন দেশে পাঠাইয়া দিত। কিন্তু পাপকার্য চির দিবস সমান ভাবে চলে না, একটী চুরি মকদ্দমায় তাহার উভয়েই ধৃত হয়। ঐ মোকদ্দমায় হোসেন আলি দুই বৎসর ও গোলাম হোসেন ৬ মাস কঠিন পরিশ্রমের সহিত কারারুদ্ধ হয়। চুরি বিদ্যা শিক্ষা করিতে হোসেন আলির যাহা কিছু অবশিষ্ট ছিল, এই দুই বৎসর সে তাহা পূর্ণ করিয়া লয়। দুই বৎসরকাল অনবরত বড় বড় চোর ও ডাকাইতদের সহবাসে সে ঐ কার্যে শ্রেষ্ঠ পদ গ্রহণ করে।

গোলাম হোসেন জেল হইতে খালাস পাইবার পর, মধ্যে মধ্যে জেলে গিয়া হোসেন আলির সহিত সাক্ষাৎ করিয়া আসিত ও আবশ্যক অনুযায়ী দ্রব্যাদি ও টাকা কড়ি দিয়া আসিত।

জেলের ভিতর দুই বৎসরকাল অতি-বাহিত করিবার সময় হোসেন আলি, রহমৎ ও তাহার অপর তিনজন অনুচরের সহিত বন্ধুত্ব স্থাপন করে। সেই সময় হইতে উর্গারা কয়েকজনেই হোসেন আলির প্রধান সহায়রূপে পরিগণিত হয়। হোসেন আলির জেল হইতে খালাস হইবার কিছু দিবস পূর্বে উর্গারা জেল হইতে মুক্তি লাভ করে। হোসেন আলি বাহিরে আসিয়াই তাহার পাঁচজন বন্ধুর সহিত মিলিত হয়, কিন্তু লক্ষ্মী সহরে বাস করিয়া তাহাদিগের ব্যবসা চালান আর যুক্তিসঙ্গত মনে করে না। আর একটী নূতন স্থানে গিয়া তাহার তাহাদিগের কার্যে প্রবৃত্ত হইতে মনস্থ করে ও অনেক ভাবিয়া চিন্তিয়া পরিশেষে তাহাদিগের কার্যক্ষেত্র দিল্লীনগরে স্থাপিত করে।

হোসেন আলি সেই স্থানে গমন করিয়া ব্যবসায়ের কেন্দ্রীভূত স্থানে একটী ঘর ভাড়া লয় ও সেই ঘরে একখান কাপড়ের দোকান খুলে। পূর্বের সঞ্চিত অর্থ কিছু তাহার নিকট ছিল, তদ্বারাই ঐ দোকান স্থাপিত হয়। তাহার অনুসঙ্গিগণও ক্রমে

ক্রমে সেই স্থানে গিয়া উপস্থিত হয়। উহারা ছয়জনই দিবাভাগে দোকানদারির ভাগে ঐ দোকানে কার্য্য করে। তাহাদের আহার ও বিশ্রামের স্থানও ঐ দোকানে। দিবা-রাত্রি ঐ স্থানে থাকিয়া অপরাপর দোকানের অবস্থা তাহারা উত্তমরূপে অবগত হইতে পারিবে বলিয়া, রাত্রি দিন সেই স্থানে অবস্থিতি করিবার ব্যবস্থা করিয়াছিল। সুযোগ মতে ঐ দোকান হইতে বাহির হইয়া নিকটবর্তী দোকান সমূহের মধ্যে যে দোকানে সুবিধা পাইত, সেই দোকানে সিঁদ কাটিয়া বা তাল ভাঙ্গিয়া চুরি করিতে পরাম্ভু হইত না। তাহারা নিতা যে ঐরূপে চুরি করিত তাহা নহে, সুবিধামতে কোন মাসে একবার, কখন বা দুই তিন মাস অন্তর মনোবাঞ্ছা পূর্ণ করিত।

বাজারের বড় বড় দোকানে ক্রমে এই-রূপে চুরি হওয়ায়, বাজারের ভিতর ভয়ানক গোলযোগ হইল। পুলিশ কর্মচারিগণও ক্রমে সতর্ক হইতে লাগিলেন। চোরাদ্রবোর আসকারা ও চোর ধৃত করিবার নিমিত্ত তাহারা বিধিমতে চেষ্টা করিতে লাগিলেন, কিন্তু কিছুতেই তাহাদিগের মনোবাঞ্ছা পূর্ণ করিতে পারিলেন না।

এইরূপে ক্রমে দুই এক বৎসর অতি-বাহিত হইয়া যাইবার পর হোসেন আলি ও তাহার দোকানের কর্মচারিগণের উপর অপরাপর দোকানদারিগণের সন্দেহ হইল,

কিন্তু প্রকাশ্যে তাহারা কোন কথা বলিতে পারিলেন না। ক্রমে ইহা পুলিশকর্মচারি-গণেরও কর্ণগোচর হইল, পুলিশকর্মচারিগণ প্রকাশ্যরূপে কোন কথা না বলিয়া, হোসেন আলি ও তাহার কর্মচারিগণের উপর গোপন ভাবে বিশেষরূপ দৃষ্টি রাখিলেন। রাত্রিকালে তাহাদিগের গতিবিধি উত্তমরূপে গোপনে পর্য্যবেক্ষিত হইতে লাগিল। হোসেন আলিও বুঝিতে পারিল যে, এত দিবস পরে তাহাদিগের উপর পুলিশের সন্দেহ হইয়াছে, সুতরাং সেই স্থানে তাহাদিগের কার্য্য আর হস্তক্ষেপ করা যুক্তিযুক্ত মনে করিল না। সুবিধামত আপনার দোকানে লোক দেখান যে সকল দ্রব্যাদি ছিল তাহার সমস্তই বিক্রয় করিয়া, সেই স্থান হইতে স্থানান্তরে গমন করিয়া পুনরায় আপনাদিগের কার্য্য প্রবৃত্ত হইতে মনস্থ করিল।

সেই স্থান হইতে দোকান উঠাইয়া দিয়া হোসেন আলি ও তাহার অনুচরগণ যে কোথায় গমন করিল, তাহা সেই স্থানের পুলিশ বা অপর কেহই জানিতে পারিলেন না। কিন্তু যে দিবস হইতে তাহারা সেই স্থান পরিত্যাগ করিল, তাহার পর দিবস হইতে দিল্লীর বাজারের কোন দোকান-দারের ঘরে সেইরূপ চুরির কথা আর কেহ জানিতে পাইলেন না।

## দশম পরিচ্ছেদ

এবার হোসেন আলি ঐ প্রদেশ একে-বারে পরিত্যাগ করিল। এবার তাহার কার্যক্ষেত্র হইল নিজ বোম্বাই সহরে। কলকাতায় যেক্রপভাবে বাড়ী লইয়া সে কারবার খুলিয়াছিল, বোম্বাই সহরে গিয়াও সে সেইরূপ ভাবে কারবারের মধ্যবর্তী স্থানে একটা বাড়ী ভাড়া লইয়া তাহাতে একটা কারবার খুলিয়া দিল। নিজের গদি খুলিয়া তাহার পূর্বে কথিত পাঁচজন অমুচরের সাহায্যে কার্য আরম্ভ করিয়া দিল। দিল্লীতে চুরি করিয়া তাহারা যে সকল অর্থ সংগ্রহ করিয়াছিল, তাহার এক চতুর্থ অংশ তাহারা তাহাদিগের নিজ খরচে ব্যয় করিত, অবশিষ্টের অর্ধেক অংশ তাহারা তাহাদিগের মধ্যে বিভাগিত করিয়া লইত, বাকী এক চতুর্থ অংশ হোসেন আলির নিকট মজুত থাকিত। সে একটা ব্যাঙ্কে ঐ টাকা জমা করিয়া রাখিয়াছিল। ঐ টাকাও নিতান্ত সামান্য ছিল না, উহার পরিমাণ প্রায় পাঁচ সহস্র মুদ্রা। ঐ টাকার জোরেই হোসেন আলি বোম্বাই সহরে এক গদি খুলিয়া বসিল, গাড়ী ষোড়া খরিদ করিল, ছাণ্ডিতে কারবার চালাইতে শুরু করিল। যে দরে মহাজনের নিকট হইতে দ্রব্যাদি খরিদ করিত, তাহার দুই এক পয়সা কমে ঐ সকল দ্রব্য বিক্রয় করিয়া, ঠিক নিয়ম মত

মহাজানের দেনা পরিশোধ করিতে লাগিল। দেখিতে দেখিতে ব্যবসা বাজারে তাহার নাম বিশেষরূপে প্রচারিত হইয়া পড়িল। বলা বাহুল্য, হোসেন আলি বোম্বাই সহরে হোসেন আলি নামে অভিহিত হয় নাই, সেইস্থানে সে নূতন নামে অভিহিত হইয়া নূতন কারবার আরম্ভ করিয়াছিল। মহাজনপটিতে যখন সে বিশেষরূপে পরিচিত হইয়া পড়িল, তখন তাহার কারবার উদ্ভম-রূপে চলিতে লাগিল, কিন্তু এ কারবারে তাহার কোনরূপ লাভ হইত না, লোকসান হইত; কারণ তাহার স্বভাব ছিল খরিদ মূল্য হইতে সামান্য কম দরে দ্রব্যাদি বিক্রয় করা।

তাহারা লাভের প্রত্যাশায় কারবার আরম্ভ করে নাই, ইহা তাহাদিগের লোক দেখান কারবার। তাহাদিগের আসল কারবার যাহা তাহাই সূচারূপে নিরীহ করিবার নিমিত্ত এই লোক দেখান কারবার আরম্ভ করিল।

উহারা ঐ স্থানে আসিয়া কারবার আরম্ভ করিবার পর হইতেই ঐ বাজারে ক্রমে বড় বড় চুরি হইতে আরম্ভ হইল। ইহার পূর্বে ঐ সকল স্থানে চুরির নাম প্রায়ই শুনিতে পাওয়া যাইত না, কিন্তু এখন হঠাৎ চুরি হইতে আরম্ভ হওয়ার, কেহই সহজে বুঝিয়া উঠিতে পারিল না, যে হঠাৎ এইরূপ চুরি আরম্ভ হইবার কারণ কি? কিন্তু সকল

দোকানদার ও ব্যবসায়িদিগের মনে বিশেষ রূপ ভয়ের সঞ্চার হইল, সকলে আপনাপন ধন সমূহ কিরূপে রক্ষা করিবেন তাহারই বিদ্রিমতে চেষ্টা করিতে লাগিলেন ও এক রূপ মনের অশান্তিতে সকলেই দিন অতি-বাহিত করিতে লাগিলেন। যাহাতে ঐ রূপ চুরি আর না হয়, তাহার প্রতিবিধানের নিমিত্ত পুলিশও বিদ্রিমতে চেষ্টা করিতে লাগিলেন, কিন্তু ঐ প্রকারের চুরি কিছুতেই বন্ধ হইল না। বৎসরের মধ্যে ঐরূপ বড় বড় চুরি পাঁচটি ছয়টি খায়ই হইতে লাগিল, কিন্তু স্থানীয় পুলিশের বিশেষ চেষ্টার ফলে কোনটীবুই কিনারা হইল না ও কাহাদিগের দ্বারা যে এই কার্য্য হইতেছে তাহারও কোনরূপ নিরাকরণ হইল না। এইরূপে বৎসরের পর বৎসর ক্রমে অতি-বাহিত হইতে লাগিল কিন্তু সেই প্রকারের চুরি কোনরূপেই বন্ধ হইল না।

এইরূপে কয়েক বৎসর অতীত হইবার পর ক্রমে পুলিশের সন্দেহ উহাদিগের উপর পতিত হইল। উহাদিগের গতি-বিধি উত্তম রূপে লক্ষ্য রাখিবার নিমিত্ত এক এক জনের পশ্চাতে তিন তিনজন লোক নিযুক্ত হইল। তাহারা রাত্রি দিন উহাদিগকে এক রূপ গোপনে নজরবন্দিতে রাখিয়া দিল। উহারাও ক্রমে বুঝিতে পারিল যে, ঐ স্থানে তাহাদিগের কার্য্য আর চলিতে পারে না। উহারা নিজের লোকদেখান যে কাবারর

ছিল তাহা উঠাইয়া দিয়া, যাহা কিছু সংগ্রহ করিতে পারিল তাহা সঙ্গে লইয়া একে একে সেই স্থান পরিত্যাগ করিল। ঐ স্থান পরিত্যাগ করিয়া যে তাহারা কোথায় গেল, অনেক চেষ্টা করিয়াও পুলিস কিছু তাহা স্থির করিতে পারিল না। উহারা প্রথমত আপন দেশে গমন করিয়া কিছু দিবস সেই স্থানে অবস্থিতি করিল, পরিশেষে কালকাতায় আসিয়া তাহারা তাহাদিগের যেরূপ কাব্য আরম্ভ করিয়াছিল, তাহা পাঠকগণ পূর্বেই অবগত আছেন।

উহাদিগের সমস্ত অবস্থা সম্যক অব-গত হইয়া ডিটেকটিভ-কন্স্টাবল এধন উহা-দিগের অনুসন্ধান করিতে আরম্ভ করিলেন। প্রথমতঃ তিনি তাহাদিগের প্রত্যেকের দেশে গমন করিয়া স্থানীয় পুলিশের সাহায্য গ্রহণ পূর্বক তাহাদিগের অনুসন্ধান করি-লেন, কিন্তু তাহাদিগের কাহাকেও তাহা-দিগের বাসস্থানে প্রাপ্ত হইলেন না। তাহা-দিগের প্রত্যেকের ঘরে খানাতল্লাসী করিয়াও কোনরূপ অপহৃত বা সন্দেহসূচক দ্রব্যও প্রাপ্ত হইলেন না।

হোসেন আলি তাহার দেশে গিয়া প্রায় শতাবধি বিধা জমি খরিদ করিয়া নূতন বাড়ী প্রস্তুত করিয়াছিল। কিন্তু সে প্রায়ই দেশে থাকিত না, কার্য্য উপলক্ষে সে প্রায়ই বাহিরে বাহিরে দিন কাটাইত। দুই চারি মাস অন্তর সময় সময় বাড়ী আসি



দশ পাঁচ দিবস অতিবাহিত করিয়া যাইত। বাড়ীতে তাহার স্ত্রী, দুইটা পুত্র ও একটি কন্যা ছিল। তাহারা জানিত যে, হোসেন আলি বাবসা বাণিজ্য করিয়া যথেষ্ট অর্থ উপার্জন করিয়া থাকে, ও যখন বাড়ীতে আইসে, সেই সময় দুই চারি মাস তাহাদিগের খরচ-পত্র নির্বাহ করিবার উপযুক্তরূপ অর্থ প্রদান করিয়া যায়। তাহারা অনেকবার হোসেন আলির সহিত তাহার বাণিজ্য স্থান গমন করিবার নিমিত্ত প্রস্তাব করিয়াছিল, কিন্তু হোসেন আলি কোনরূপেই তাহাদিগের প্রস্তাবে সন্মত হয় নাই। হোসেন আলির কারবারের স্থল যে কোথায়, তাহাও তাহারা অবগত ছিল না। জিজ্ঞাসা করিলে সে বলিত, তাহার কারবার করিবার স্থানের কিছুমাত্র স্থিরতা নাই, ভারতবর্ষের সকল স্থানে সে ঘুরিয়া বেড়ায়, ও যে স্থানে যখন যে দ্রব্য সুবিধা পায়, তাহাই ধরিদ বিক্রয় করিয়া দশ টাকার সংস্থান করিয় লয়।

ডিটে কটিভ কর্মচারী নানা স্থানে উহাদিগের অনুসন্ধান করিলেন, যে যে স্থানে উহারা এক একবার আপনাদিগের কার্যক্ষেত্র বিস্তার করিয়াছিল, সেই সকল স্থানে তিনি উহাদিগের বিশেষরূপ অনুসন্ধান করিলেন, কিন্তু কোন স্থানেই উহাদিগের কোনরূপ অনুসন্ধান প্রাপ্ত হইলেন না। সুতরাং সেই কর্মচারী নিতান্ত হতাশ হইয়া,

কলিকাতায় প্রত্যাগমন করিলেন। কিন্তু কলিকাতায় আসিয়াও যে তিনি একেবারে স্থির হইয়া রহিলেন, তাহা নহে; এখানেও তিনি তাঁহার সাধ্যমত, তাহাদিগের অনুসন্ধান করিতে লাগিলেন।

কলিকাতায় আসিয়া তিনি হোসেন আলির খণ্ডর করিম বক্সের সহিত সাক্ষাৎ করিয়াছিলেন, ও হোসেন আলি সম্বন্ধে যাহা তিনি জানিতে পারিয়াছিলেন, তাহার সমস্তই তিনি তাঁহার নিকট প্রকাশ করিয়াছিলেন। এখন করিম বক্স, হোসেন আলির সমস্ত অবস্থা জানিতে পারিয়া নিতান্ত মর্মান্বিত হইলেন। অপরিচিত লোকের সহিত তিনি তাঁহার কন্যার বিবাহ দিয়া, বিবিয়ার যে তিনি কি সর্কনাশ করিয়াছেন, তাহার জন্য তিনি যে কতদূর মর্মান্বিত হইলেন, তাহা বলা যায় না। এই সকল কথা তিনি কিছু দিবস কাহারও নিকট প্রকাশ করিলেন না। কিন্তু মন্দ কথা প্রকাশ হইতে কখনই দেৱী হয় না। ক্রমে হোসেন আলির চরিত্রের কথা সকলেই অবগত হইলেন। করিম বক্সের বন্ধু বাকুবগণ ইহা অবগত হইয়া, তাঁহাকে বিশেষরূপ অনুযোগ করিতে লাগিলেন। করিম বক্স বিনা বাক্য ব্যয়ে সকলই সহ্য করিলেন। বিবিয়া চক্ষুজলে আপন বক্ষ ভাসাইয়া অন্তঃপুরের মধ্যে বাস করিতে লাগিলেন।

এইরূপে কিছু দিবস অতিবাহিত হইবার

পর, হোসেন আলি তাহার অনুচরগণের সহিত কোন একটা নিন্দনীয় স্থানে ধৃত হইলেন ।

হোসেন আলির নামে যে সকল মকদ্দমা উপস্থিত হইয়াছিল, করিম বক্স সেই সকল মকদ্দমার ফরিয়াদীকে যতদূর সম্ভব অর্থ প্রদান করিয়া সম্বুধে করিলেন । মকদ্দমার সময় তাহার আর বিশেষরূপ পীড়াপীড়ি করিল না । বিচারকালীনও যতদূর সম্ভব উকোল কোঙ্গলির যোগাড় করিয়া করিম বক্স তাহার মকদ্দমার তহির করিতে লাগিলেন । অনেকগুলি মকদ্দমা হইতে হোসেন আলি নিষ্কৃতি পাইল । কিন্তু একেবারে অব্যাহতি পাইল না । কেবলমাত্র দুই বৎসরের নিমিত্ত সে কারারুদ্ধ হইল । সিঁদ চুরির কোন মোকদ্দমার অপহৃত দ্রব্য তাহার নিকট পাওয়া গেল না, সুতরাং ঐ সকল মকদ্দমায় সে নিষ্কৃতি লাভ করিল । হোসেন আলির

অপরামর সঙ্গিগণের মধ্যে সকলেই উপযুক্ত রূপ দণ্ড প্রাপ্ত হইল ।

হোসেন আলি কারারুদ্ধ হইবার পর করিম বক্স, হোসেন আলির অপর স্ত্রী ও পুত্রগণকে দেশ হইতে আনাইয়া, নিজের বাড়ীতেই স্থান প্রদান করিলেন, ও যাহাতে বিবিয়ার সহিত তাহাদিগের মনের মিল থাকে, তাহারই চেষ্টা করিতে লাগিলেন । দুই বৎসর অতীত হইলে হোসেন আলি জেল হইতে প্রত্যাগমন করিবার পর তাহাকেও নিজের বাড়ীতে তাহার দুই স্ত্রীর সহিত একত্রে থাকিবার স্থান নির্দেশ করিয়া দিয়া, তাহাদিগের সমস্ত ধরচের ভার নিজে গ্রহণ করিয়া, যাহাতে হোসেন আলি তাহার অনুচরগণের সহিত আর কখন মিশিতে না পারে, ও যাহাতে তাহার স্বভাব পরিবর্তন হইয়া যায়, তাহার চেষ্টা করিতে লাগিলেন, ও অনেক পরিমাণে কৃতকার্য্যও হইলেন ।

সমাপ্ত ।